

EMBARGO
23 NOVEMBER 2023 (KHAMIS)
SEHINGGA JAM 12.00 TENGAH HARI

**TEKS UCAPAN
PEMBENTANGAN BELANJAWAN
JOHOR 2024**

**“MEMACU PEMBANGUNAN,
MENYEJAHTERAKAN RAKYAT”**

**OLEH
YANG AMAT BERTHORMAT
DATO' ONN HAFIZ BIN GHAZI
MENTERI BESAR JOHOR**

**DALAM
PERSIDANGAN DEWAN NEGERI JOHOR**

**TARIKH
23 NOVEMBER 2023**

Bismillahir Rahmanir Rahim
Assalamualaikum warahmatullahi wabarakatuh
Salam Sejahtera dan Salam Maju Johor.

PENDAHULUAN

Dari Bintan ke Tanjung Puteri
Singgah Temasek membawa pesan
Titah Raja bijak bestari
Negeri maju bercitra wawasan

Yang Berhormat Datuk Speaker,

1. Alhamdulillah, marilah kita memanjatkan setinggi-tinggi kesyukuran ke hadrat Allah SWT, kerana dengan limpah kurnia dan rahmat-Nya jua, dapat kita bersama-sama hadir dalam pembentangan Belanjawan Johor 2024 pada hari ini.
2. Marilah kita turut sama melafazkan selawat dan salam buat junjungan besar Nabi Muhammad SAW, teladan yang sentiasa menjadi pedoman buat kita sehingga ke akhir zaman.
3. Sebelum meneruskan ucapan pembentangan belanjawan ini, izinkan patik merakamkan ucapan Selamat Hari Ulang Tahun Keputeraan Duli Yang Maha Mulia Sultan Ibrahim Ibni Almarhum Sultan Iskandar yang jatuh pada tanggal 22 November.
4. Patik turut merakamkan sembah seraya merakamkan ucapan setinggi-tinggi tahniah dan ucap selamat kepada **Duli Yang Maha Mulia Sultan Ibrahim Ibni Almarhum Sultan Iskandar Sultan Yang DiPertuan Bagi Negeri dan Jajahan Takluk Johor Darul Ta'zim** sempena pengisytiharan sebagai **Seri Paduka Baginda Yang DiPertuan Agong ke-17**.
5. Patik berdoa ke hadrat Allah Subhanahu Wa Ta'ala semoga **Duli Yang Maha Mulia Tuanku Sultan Johor** dan **Duli Yang Maha Mulia Tuanku Permaisuri Johor** serta seluruh kerabat diraja dilanjutkan usia serta sentiasa berada dalam keafiatan agar dapat terus menaungi patik-patik semua dan Bangsa Johor sekaliannya.

6. Patik menjunjung setinggi-tinggi kasih juga penghargaan tidak terperi atas segala nasihat, bimbingan dan panduan yang diberikan oleh **Duli Yang Maha Mulia Tuanku** demi memastikan pentadbiran Negeri Johor terus diperhebat dalam memacu Agenda Maju Johor 2030.
7. Patik juga menjunjung setinggi-tinggi kasih buat **Duli Yang Amat Mulia Tunku Ismail Ibni Sultan Ibrahim, Tunku Mahkota Johor** yang tidak pernah lekang memberi galakan, motivasi dan inspirasi bagi memacu kemajuan Negeri Johor.
8. Patik turut ingin mengambil kesempatan ini untuk mengucapkan setinggi-tinggi tahniah kepada pasukan JDT yang diterajui oleh **Duli Yang Amat Mulia Tunku Mahkota Johor** kerana telah memenangi Piala Sumbangsih, Piala FA, juga menjuarai Liga Super 10 kali berturut-turut. Marilah kita berdoa agar Piala Malaysia juga akan menjadi milik pasukan JDT.

BELANJAWAN PERSEKUTUAN 2024

Yang Berhormat Datuk Speaker,

9. Bagi pihak Kerajaan Negeri, saya turut ingin mengambil kesempatan ini untuk mengucapkan jutaan terima kasih kepada Yang Amat Berhormat Perdana Menteri, Dato' Seri Anwar Ibrahim dan Kerajaan Persekutuan atas peruntukan sebanyak **RM 4.7 bilion** bagi perbelanjaan pembangunan **Rolling Plan 4 (2024) di bawah Rancangan Malaysia Kedua Belas** bagi Negeri Johor yang merangkumi **368 projek sambungan dan 142 projek baharu**. Antaranya termasuklah:

Pertama : Pembinaan **Hospital Sultanah Aminah 2 (HSA2)** Johor Bahru;

Kedua : Projek pelebaran Lebuhraya Utara-Selatan (PLUS) **daripada 4 kepada 6 lorong** yang dilanjutkan dari Sedenak ke Simpang Renggam;

Ketiga : Pembinaan **Kompleks Hospital Pengajar USIM di Kota Tinggi**;

- Keempat : **Program Perumahan Rakyat** termasuk satu **projek baharu di Kluang**;
- Kelima : Penubuhan pusat pengajian kecerdasan buatan yang pertama negara iaitu **Fakulti Kecerdasan Buatan (AI) di UTM**;
- Keenam : **Pengerang Integrated Petroleum Complex (PIPC)** dijadikan hab pembangunan sektor kimia dan petrokimia dengan pemberian pakej galakan cukai dalam bentuk kadar cukai khas atau elaun cukai pelaburan;
- Ketujuh : **Melonggarkan syarat-syarat** sedia ada bagi permohonan **Malaysia My Second Home (MM2H)**;
- Kelapan : Mewujudkan sebuah **agensi tunggal sempadan negara** atau *single border agency* (SBA).

SENARIO DAN PROSPEK EKONOMI

Yang Berhormat Datuk Speaker,

10. Sebelum saya melangkah lebih jauh lagi dalam membentangkan Belanjawan Negeri Johor 2024 ini, izinkan saya untuk terlebih dahulu mengulas sedikit berhubung senario dan prospek ekonomi hari ini.
11. Ekonomi semasa dunia terus berada dalam keadaan yang mencabar, akibat ketegangan geopolitik yang terus meruncing dan tindakan mengetatkan dasar kewangan yang berterusan di negara-negara utama seperti Amerika Syarikat, United Kingdom dan negara-negara Kesatuan Eropah bagi menangani inflasi.
12. Keadaan ini diburukkan lagi dengan ketidaktentuan ekonomi utama yang telah memberikan impak kepada negara membangun, serta kelemahan dalam dinamika perdagangan berikutan gangguan rantai bekalan dan ketegangan perdagangan yang berlanjutan.

13. Ketidaktentuan yang berlarutan ini telah mendorong IMF untuk mengunjurkan prospek pertumbuhan global menyederhana kepada 3 peratus pada 2023 dan 2024.

SENARIO EKONOMI MALAYSIA

14. Sebagai sebuah negara dengan ekonomi terbuka, Malaysia turut terkesan dengan situasi ini - terutamanya dari segi rantai bekalan perdagangan, inflasi dan kemerosotan nilai mata wang. Walaupun kita telah berada dalam tahun kedua fasa pemulihan, ketidaktentuan ekonomi global ini tentunya memberi kesan kepada pertumbuhan ekonomi negara termasuk Negeri Johor yang turut berekonomi terbuka.
15. Lantaran itu, Kerajaan Persekutuan meramalkan kadar pertumbuhan ekonomi negara pada kadar sederhana 4 peratus sahaja pada tahun 2023, dan antara 4 hingga 5 peratus pada tahun 2024.

SENARIO EKONOMI JOHOR

Yang Berhormat Datuk Speaker,

16. Bagi Negeri Johor pula, syukur Alhamdulillah, suka saya kongsikan bahawa keadaan ekonomi Johor terus rancak dalam era pemulihan ini. Meskipun masih dihimpit oleh ketidaktentuan global, Johor terus menunjukkan prestasi yang memberangsangkan. Prestasi ekonomi Johor telah mencatatkan pertumbuhan amat baik iaitu **8.2 peratus** pada tahun 2022 berbanding 2.5 peratus sahaja pada tahun 2021. Johor juga terus menjadi antara destinasi utama pelaburan di Malaysia iaitu sebanyak **RM 14.2 bilion** sehingga separuh pertama tahun ini.
17. Bagi tahun 2023 ini, prestasi ekonomi Johor terus merekodkan angka-angka yang memberangsangkan sebagaimana dibuktikan oleh data dan statistik berikut:-

Pertama : Jumlah **import** telah meningkat daripada **RM 209 bilion** pada tahun 2022 kepada **RM 249 bilion** pada tahun 2023 iaitu peningkatan sebanyak **19 peratus**;

- Kedua : Jumlah **eksport** Johor juga terus meningkat daripada **RM 246 bilion** pada tahun 2022 kepada **RM 314 bilion** sehingga September 2023, iaitu peningkatan sebanyak **28 peratus**. Dengan **peningkatan import dan eksport** yang berjumlah **RM 563 bilion** pada 9 bulan pertama tahun ini, Johor muncul sebagai penyumbang terbesar perdagangan negara;
- Ketiga : Sektor pembinaan yang telah mula mencatatkan tanda-tanda pemulihan pada tahun lepas terus merekodkan pertumbuhan memberangsangkan sehingga suku ketiga tahun ini dengan nilai berjumlah **RM 10.8 bilion** berbanding **RM 8.9 bilion** pada tempoh yang sama tahun lalu;
- Keempat : Kadar pengangguran terus kekal pada kadar yang rendah iaitu **2.5 peratus** pada suku ketiga tahun ini.

18. Justeru, melalui Belanjawan Johor 2024 ini, saya akan berusaha memperincikan pelbagai inisiatif yang bertujuan mengurangkan impak ekonomi global dan memastikan sasaran pertumbuhan dapat dipacu, yang insya-Allah, akan membantu mempertingkatkan kesejahteraan Bangsa Johor.

Yang Berhormat Datuk Speaker,

19. Kita semua sedia maklum bahawa Johor mempunyai visi yang jelas untuk menjadi sebuah negeri maju menjelang tahun 2030. Ia bukan sahaja maju dari segi ekonomi dan infrastrukturnya – malah serata Johor mestilah maju secara holistik.
20. Namun, semua ini tidak akan dapat dikecapi jika kita semua tidak bersatu hati, dan masih bekerja secara 'silo', dalam kelompok masing-masing.
21. Oleh sebab itu, saya ingin mengajak semua yang berada di dalam dewan ini untuk bergerak sebagai satu pasukan, dalam satu saf - seganding, senada dan seiring - untuk terus berusaha dengan pelbagai strategi mengurus dan memajukan negeri dengan cara berhemah dan penuh bijaksana.

22. Itulah harapan besar saya untuk menggembelngkan semuanya secara bersepadu dengan kudrat dari kesemua agensi yang ada di Johor.

Sepuluh daerah kukuh dan jitu
Saling membantu tiada disekat
Bangsa Johor tetap bersatu
Muafakat teguh membawa berkat

TEMA: MEMACU PEMBANGUNAN, MENYEJAHTERAKAN RAKYAT

Yang Berhormat Datuk Speaker,

23. Sebelum saya memulakan pembentangan Belanjawan Johor 2024, saya ingin mengajak seluruh Ahli Dewan untuk sama-sama menghayati sepotong doa yang pernah diungkapkan oleh Nabi Muhammad S.A.W yang berbunyi,

اللَّهُمَّ مَنْ وَلِيَ مِنْ أَمْرِ هَذِهِ أُمَّتِي شَيْئاً فَرَّقَ بِهِمْ، فَارْفُقْ بِهِ. وَمَنْ شَقَّ عَلَيْهَا فَاشْفُقْ عَلَيْهِ

"Ya Allah, barang siapa yang diberi kuasa untuk menguruskan urusan umatku, kemudian ia memudahkan urusan mereka, maka permudahkanlah dia. Dan barang siapa yang mengurus urusan umatku lalu dia menyusahkan mereka, maka susahkanlah dia". (Hadis Riwayat Muslim)

24. Bait-bait doa ini sewajarnya menjadi pedoman untuk kita sentiasa melakukan kebaikan sebagai pemimpin dalam memudahkan urusan dan membawa kemaslahatan kepada rakyat. Dalam masa sama, ia turut memberi peringatan kepada kita semua agar tidak tergolong dari kalangan orang yang cuai atau culas dalam melaksanakan amanah terhadap rakyat.
25. Semestinya kita arif dan insaf akan hakikat bahawa rakyat di luar sana sedang menghadapi pelbagai cabaran terutamanya berkaitan kenaikan harga barang-barang keperluan dan kejatuhan nilai mata wang yang sekaligus menyebabkan kenaikan kos sara hidup.
26. Sehubungan itu, bagi Belanjawan 2024, Kerajaan Negeri Johor mengambil tema "**Memacu Pembangunan, Menyejahterakan Rakyat**" sebagai suatu kesinambungan perjuangan

memartabatkan pembangunan ekonomi Johor yang gemilang demi meningkatkan kesejahteraan Bangsa Johor.

UNJURAN KEWANGAN BELANJAWAN 2024

Yang Berhormat Datuk Speaker,

27. Dalam **Belanjawan Johor 2023** yang telah dibentangkan pada bulan Disember tahun lepas, Kerajaan Negeri telah mengunjurkan terimaan **hasil Negeri Johor** berjumlah **RM 1.734 bilion**. Alhamdulillah, sukacita saya kongsi bahawa sehingga **22 November 2023**, kutipan hasil sebenar **telah melebihi 100%** iaitu sebanyak **RM 1.767 bilion**.
28. Pada tahun **2024** pula, unjuran **hasil** Negeri Johor adalah sebanyak **RM 1.804 bilion**. Manakala unjuran **perbelanjaan** pada tahun 2024 adalah sebanyak **RM 1.799 bilion**. Angka-angka ini menunjukkan Belanjawan 2024 merupakan **Belanjawan Lebihan** atau **surplus budget** iaitu sebanyak **RM 4.21 juta**. Sejumlah **RM 1.163 bilion** pula diperuntukkan bagi tujuan **Belanja Mengurus**.

ANGGARAN HASIL 2024

Yang Berhormat Datuk Speaker,

29. Pada tahun 2024, Kerajaan Negeri Johor mensasarkan pungutan hasil sebanyak **RM 1.804 bilion** iaitu peningkatan sebanyak **RM 69.96 juta** atau 4.03 peratus berbanding tahun 2023.
30. Berdasarkan anggaran tersebut, sebanyak **RM 858.93 juta** disumbangkan melalui cukai langsung, manakala sebanyak **RM 31.67 juta** melalui cukai tidak langsung. Hasil cukai yang dikutip ini sebahagian besarnya atau kira-kira **89.64 peratus** datang dari **sumber cukai tanah**.
31. Menyedari situasi di mana perbelanjaan negeri semakin meningkat setiap tahun, maka terdapat keperluan untuk Kerajaan Negeri mencari kaedah lain bagi meningkatkan hasil. Kerajaan Negeri akan melaksanakan langkah berstruktur dan mampan untuk menggembelng segala sumber yang ada agar matlamat ini dapat dicapai.

CABARAN BELANJAWAN 2024

Yang Berhormat Datuk Speaker,

32. Sesungguhnya, menggubal sebuah belanjawan yang komprehensif, bukanlah satu perkara yang mudah. Namun ia sentiasa menjadi keutamaan saya dan pasukan dalam merangka belanjawan ini.
33. Sepanjang beberapa bulan yang lalu, Kerajaan juga telah menerima pelbagai idea dan cadangan daripada segenap lapisan rakyat termasuk daripada Ahli-Ahli Yang Berhormat daripada pihak Kerajaan dan juga pihak Pengimbang. Saya amat menghargai dan mengucapkan terima kasih atas segala pandangan yang diberikan.
34. Bertitik tolak dari itu, Belanjawan Johor 2024 digubal dengan berpegang kepada **Enam Teras Maju Johor** dengan didukung oleh **29** strategi dan disokong ampuh oleh **99** inisiatif yang tentunya berkait rapat dengan perancangan masa depan.

TERAS PERTAMA: TADBIR URUS KERAJAAN

Yang Berhormat Datuk Speaker,

35. Teras pertama ialah **TADBIR URUS KERAJAAN.**

Negeri Johor paling selatan
Jajahan takluk sepuluh daerah
Tadbir urus penguat ikatan
Makmur negeri penuh sejarah

36. Tadbir urus adalah tiang seri kekuatan sesebuah kerajaan. Tadbir urus yang cekap, berintegriti dan efektif menggambarkan komitmen tinggi para pentadbir dan pemimpin yang berwawasan. Dengan itu, **5 strategi** dan **19 inisiatif** telah dirangka untuk memperkasa tadbir urus di Negeri Johor.

STRATEGI 1 : PENYAMPAIAN PERKHIDMATAN AWAM YANG RESPONSIF

37. Strategi pertama di bawah teras ini ialah **PENYAMPAIAN PERKHIDMATAN AWAM YANG RESPONSIF** untuk

memastikan keberkesanan dan kecekapan pentadbiran kerajaan. Justeru, inisiatif-inisiatif berikut akan dilaksanakan;

INISIATIF 1: SUMBANGAN KEPADA PEGAWAI DAERAH

38. Inisiatif pertama di bawah strategi ini ialah **SUMBANGAN KEPADA PEGAWAI DAERAH**. Kerajaan Negeri bersetuju meneruskan sumbangan berjumlah **RM 2 juta** bagi membolehkan Pegawai Daerah melaksanakan program kemasyarakatan dan memberi bantuan awal kepada penduduk yang terkesan dengan bencana. Sebagai tambahan, sejumlah **RM 1 juta** lagi akan diperuntukkan di bawah Tabung Amanah Bencana Negeri Johor.

INISIATIF 2: GERAN KESEIMBANGAN PIHAK BERKUASA TEMPATAN (PBT)

39. Inisiatif seterusnya, ialah **GERAN KESEIMBANGAN PIHAK BERKUASA TEMPATAN (PBT)**. Kerajaan Negeri akan memperuntukkan sejumlah **RM 16 juta** bagi menampung keperluan PBT-PBT yang mempunyai sumber hasil yang terhad.

INISIATIF 3: MENAMBAH BAIK SISTEM PENYAMPAIAN KAUNTER DI PEJABAT TANAH DAN GALIAN JOHOR (PTG)

40. Inisiatif ketiga ialah **MENAMBAH BAIK SISTEM PENYAMPAIAN KAUNTER DI PEJABAT TANAH DAN GALIAN JOHOR (PTG)**. Bagi memastikan urusan kaunter yang lebih efisien, PTG Johor akan melaksanakan beberapa penambahbaikan sebagaimana berikut:

Pertama : Penambahan kaunter Pendaftaran dan Hakmilik Strata daripada 18 kepada 28 kaunter berserta penambahan 45 orang kakitangan secara berperingkat. Inisiatif ini akan dapat menambah kapasiti transaksi urusan niaga daripada 1,400 kepada lebih 2,800 transaksi sehari;

Kedua : Penyediaan kiosk bagi urusan carian hakmilik strata untuk mengurangkan kesesakan di kaunter;

Ketiga : Mewujudkan nombor giliran secara digital bagi memberi kemudahan kepada orang awam mendapatkan nombor giliran walau di mana sahaja mereka berada untuk berurusan di PTG Johor.

INISIATIF 4: MENAIK TARAF BADAN KAWALSELIA AIR JOHOR (BAKAJ)

41. Inisiatif keempat adalah **MENAIK TARAF BADAN KAWALSELIA AIR JOHOR (BAKAJ)**. Inisiatif ini amat penting bagi memastikan pengurusan sumber air di Johor diurus dengan lebih cekap dan berkesan. Justeru, Kerajaan Negeri bersetuju menaik taraf Badan Kawalselia Air Johor kepada **Lembaga Air Johor**.

STRATEGI 2: MENSEJAHTERAKAN PENJAWAT AWAM

Yang Berhormat Datuk Speaker,

42. Strategi kedua di bawah teras ini ialah **MENSEJAHTERAKAN PENJAWAT AWAM**.

INISIATIF 1: JOHOR SIHAT PENJAWAT AWAM

43. Inisiatif pertama di bawah strategi ini ialah **JOHOR SIHAT PENJAWAT AWAM**. Penjawat awam yang sihat pastinya mampu menghasilkan produktiviti yang lebih tinggi dan berkualiti. Menyedari tentang kepentingan kesihatan fizikal dan mental dalam kalangan warga perkhidmatan awam, Kerajaan Negeri akan melaksanakan inisiatif berikut:

Pertama : **RM 1.95 juta** bagi **Pakej Pemeriksaan Kesihatan Menyeluruh** untuk penjawat awam Negeri Johor dengan kerjasama Kumpulan Perubatan Johor (KPJ). Pakej ini meliputi Ujian Prostat bagi lelaki dan Ujian Pap Smear bagi perempuan serta ujian pemeriksaan darah bagi saringan tahap kolesterol, fungsi hati dan buah pinggang serta imbasan x-ray. Inisiatif ini akan

memberi manfaat kepada lebih **13 ribu penjawat awam** Negeri Johor.

Kedua : **RM 1.2 juta** bagi menampung **50 peratus** daripada **Kos Perlindungan Insurans Kesihatan Penjawat Awam Negeri Johor** untuk memastikan penjawat awam dan seisi keluarga menerima manfaat daripada program Takaful melalui Cuepacs Care.

Ketiga : **RM 500 ribu** bagi memudahkan penjawat awam dan masyarakat **mendapatkan khidmat kaunseling dan terapeutik** di Klinik Kaunseling, **Pusat Mind X** Daerah. Di samping itu, usaha-usaha pemantapan **Panel Kaunselor** akan dijalankan di Pejabat Setiausaha Kerajaan Johor.

INISIATIF 2: JOHOR PRIHATIN

44. Inisiatif kedua ialah **JOHOR PRIHATIN**. Kerajaan Negeri berbesar hati menyediakan peruntukan sebagaimana berikut;

Pertama : **RM 5.9 juta** diperuntukkan kepada Bilik Guru di **1,193 buah** sekolah yang akan memberi manfaat kepada **48,500 orang** guru Sekolah Menengah dan Sekolah Rendah.

Kedua : **RM 1.9 juta** diperuntukkan kepada Bilik Pantri Kakitangan bagi **465 buah** fasiliti kesihatan seluruh Negeri Johor yang akan memberi manfaat kepada **7,218 orang jururawat** dan **2,672 orang doktor**.

Ketiga : **RM 1 juta** bagi kerja-kerja baik pulih di **13 buah Ibu pejabat Polis Daerah** atau (IPD) di seluruh Negeri Johor yang akan memberi manfaat kepada seramai **7,834 pegawai** dan anggota.

- Keempat : **RM 1 juta** bagi kerja-kerja baik pulih **8 buah** Kem Tentera di seluruh Negeri Johor dan akan memberi manfaat kepada **7,790 pegawai** dan anggota.
- Kelima : **RM 200 ribu** diperuntukkan kepada Jabatan Imigresen Malaysia untuk memastikan penyelesaian anggota bertugas;
- Keenam : **RM 500 ribu** bagi **Geran Bantuan Pentadbiran** kepada Persatuan-Persatuan Pesara Penjawat Awam Johor termasuklah Persatuan Bekas Wakil Rakyat (Mubarak Johor), Persatuan Veteran ATM, Persatuan Pesara Polis Negeri Johor dan lain-lain.

STRATEGI 3: MEMPERKASA INSTITUSI AKAR UMBI

Yang Berhormat Datuk Speaker,

45. Strategi ketiga di bawah teras ini ialah **MEMPERKASA INSTITUSI AKAR UMBI**.

INISIATIF 1: MENINGKATKAN KEUPAYAAN JAWATANKUASA PEMBANGUNAN DAN KESELAMATAN KAMPUNG (JPKK)

46. Inisiatif pertama di bawah strategi ini ialah **MENINGKATKAN KEUPAYAAN JAWATANKUASA PEMBANGUNAN DAN KESELAMATAN KAMPUNG (JPKK)** dalam program pembangunan masyarakat di negeri ini. Justeru, beberapa inisiatif akan dilaksanakan iaitu:

- Pertama : **RM 12 juta** bagi memastikan penyelenggaraan parit-parit di kawasan pertanian dan kampung diurus dengan lebih baik. JPKK akan kembali diberikan tanggungjawab untuk melaksanakan kerja-kerja penyelenggaraan secara gotong-royong di bawah seliaan JPS.

- Kedua : **RM 120 ribu** geran pengurusan dan pentadbiran kepada Persatuan Ketua Kampung Negeri Johor di mana RM 20 ribu bagi Persatuan Ketua Kampung Negeri dan RM 10 ribu bagi 10 Persatuan Ketua Kampung Daerah-Daerah.
- Ketiga : **RM 810 ribu** geran pentadbiran dan pengurusan kepada 73 Jawatankuasa Kemajuan dan Keselamatan Rancangan (JKKR) Felda dan 8 JKPP Felcra di Johor di mana setiap JKJR dan JKPP akan menerima **RM 10 ribu**.

INISIATIF 2 : MENINGKATKAN PROFESIONALISME INSTITUSI PEMIMPIN MASYARAKAT

47. Inisiatif kedua ialah **MENINGKATKAN PROFESIONALISME INSTITUSI PEMIMPIN MASYARAKAT**. Berdasarkan maklumbalas positif bagi pelaksanaan program **Kursus Sijil Profesional** kepada ketua-ketua kampung, program ini akan diperluaskan kepada semua **Ahli Majlis PBT** serta **Ketua Masyarakat Cina dan India** dengan peruntukan berjumlah **RM 360 ribu**.

INISIATIF 3: PENGURUSAN DAN PENTADBIRAN KAMPUNG ORANG ASLI

48. Inisiatif ketiga pula ialah **PENGURUSAN DAN PENTADBIRAN KAMPUNG ORANG ASLI**. Kehidupan dan kebajikan Orang Asli perlu terus diberi perhatian oleh semua pihak. Justeru itu, inisiatif berikut akan dilaksanakan;
- Pertama : **RM 166 ribu** bagi elaun batin sebanyak **RM 300 sebulan** kepada **46 Batin** sebagai tambahan daripada sumbangan Kerajaan Persekutuan iaitu **RM 900 sebulan**. Ini menjadikan jumlah keseluruhan elaun Batin meningkat kepada **RM 1,200 sebulan**;

Kedua : **RM 600 ribu** diperuntukkan kepada **60 buah** Kampung Orang Asli untuk melaksanakan pelbagai program komuniti, kebudayaan dan adat resam masyarakat Orang Asli.

STRATEGI 4: MENINGKATKAN KOMPETENSI PENJAWAT AWAM NEGERI JOHOR

49. Strategi keempat di bawah teras ini ialah **MENINGKATKAN KOMPETENSI PENJAWAT AWAM NEGERI JOHOR**. Akademi Perkhidmatan Tadbir Negeri Johor atau Akademi JCS akan terus berperanan sebagai pusat latihan pengembangan ilmu dengan wadah untuk melahirkan penjawat awam yang berkeupayaan dan berkemahiran bagi mengurus serta membantu dalam pembentukan dasar negeri menerusi pengalaman dan pembelajaran yang berkualiti.

INISIATIF 1: PROGRAM PASCA SISWAZAH UNTUK KUMPULAN PENGURUSAN DAN PROFESIONAL

50. Inisiatif pertama di bawah strategi ini ialah **PROGRAM PASCA SISWAZAH UNTUK KUMPULAN PENGURUSAN DAN PROFESIONAL**. Pada masa kini, seramai 103 orang Pegawai Tadbir Negeri Johor (JCS) telah mengikuti program pasca siswazah di mana **8 orang pegawai** telah memperolehi Ijazah **Doktor Falsafah (PhD)** dan **95 orang pegawai** memiliki Ijazah **Sarjana (Master)**.

51. Bagi meneruskan usaha melahirkan bakat terbaik selaras dengan agenda transformasi perkhidmatan awam, **RM 500 ribu** diperuntukkan bagi menghantar 20 orang pegawai untuk mengikuti program Sarjana dan PhD. Inisiatif ini turut dipanjangkan kepada **pegawai-pegawai di Majlis Agama Islam Johor (MAINJ)** dan **PBT**.

52. Selain itu, Kerajaan Negeri melalui Akademi JCS juga akan terus mempersiapkan calon-calon bagi mengikuti program sarjana di National University of Singapore (NUS) dan Nanyang Technological University (NTU) di bawah tajaan penuh Kerajaan Singapura.

INISIATIF 2 : KURSUS JANGKA PENDEK

53. Inisiatif kedua ialah melaksanakan pelbagai **KURSUS JANGKA PENDEK** untuk menghasilkan pemimpin yang dinamik dan berdaya saing. Beberapa program berimpak dirancang dengan peruntukan sejumlah **RM 4 juta** sepertimana berikut:

Pertama : **RM 770 ribu** bagi kursus kepimpinan pegawai kanan di institusi pengajian tinggi terkemuka dunia seperti Oxford University di UK dan Harvard University di USA;

Kedua : **RM 1.4 juta** bagi program **Diploma Profesional Pasca Siswazah Pembangunan Tanah, Sijil-Sijil Profesional dan Program Route To Technologist (Ts.) dan Technician (Tc.)** dengan kerjasama antara Akademi JCS dan UTM;

Ketiga : **RM 1.8 juta** bagi pelaksanaan 15 program peningkatan kemahiran untuk kumpulan pelaksana.

54. Di samping itu, menyedari kepentingan penguasaan bahasa Inggeris sebagai lingua franca global, Kerajaan Negeri juga melalui kerjasama Akademi JCS dan Iskandar Investment Berhad (IIB) akan meneruskan pelaksanaan **Program English for Professional**.

STRATEGI 5 : MEMPERKUKUH TADBIR URUS SYIAR ISLAM

Yang Berhormat Datuk Speaker,

55. Seterusnya strategi kelima di bawah teras ini ialah **MEMPERKUKUH TADBIR URUS SYIAR ISLAM**. Sejak pemodenan Johor pada 1895, syiar Islam terus dipacu bersama pembangunan Johor dalam aspek ekonomi, politik dan sosial. Justeru itu, berikut disertakan beberapa inisiatif yang akan dilaksanakan bagi memperkukuh syiar Islam di Johor.

INISIATIF 1 : PROGRAM SEMARAK SUBUH

56. Inisiatif pertama di bawah strategi ini ialah **PROGRAM SEMARAK SUBUH**. Hal ini amat penting kerana dalam memacu pembangunan negeri, pentadbiran kerajaan sentiasa memberi penekanan kepada dua dimensi utama iaitu menjaga hubungan antara manusia dengan Tuhan (*hablum minallah*) dan hubungan sesama manusia (*hablum minannas*).
57. Kedua-dua dimensi ini akhirnya akan menatijahkan kejayaan untuk kita menjadi khalifah Allah SWT di muka bumi ini yang sentiasa di dalam petunjuk dan redha-Nya. Insya-Allah.
58. Sehubungan itu, Program Semarak Subuh akan dilaksanakan bagi membolehkan semua Ahli Yang Berhormat yang beragama Islam untuk menunaikan solat subuh berjemaah, tadabbur Al-Quran, dan seterusnya menyantuni para jemaah di masjid atau surau pada setiap pagi Jumaat dalam kawasan DUN masing-masing. Bagi Yang Berhormat wanita dan Yang Berhormat bukan beragama Islam pula bolehlah menghantar wakil dari Pusat Khidmat Masyarakat DUN masing-masing.
59. **RM 560 ribu** diperuntukkan bagi menjayakan **2,688 Program Semarak Subuh** di **56 kawasan DUN** sepanjang tahun 2024. Ini bermaksud setiap masjid dan surau di seluruh pelusuk Negeri Johor akan disantuni dalam masa setahun. Pegawai Daerah, Kadi Daerah, Imam Daerah dan pegawai-pegawai agensi kerajaan serta pemimpin masyarakat akan turut bersama di dalam program ini.

INISIATIF 2 : PROGRAM MEMBUDAYAKAN AL-QURAN PENJAWAT AWAM

60. Inisiatif kedua pula ialah **PROGRAM MEMBUDAYAKAN AL-QURAN PENJAWAT AWAM**. Sesungguhnya Al-Quran merupakan mukjizat utama yang kekal sehingga hari kiamat. Bagi meningkatkan kefahaman kandungan Al-Quran dalam kalangan penjawat awam beragama Islam, program membudayakan Al-Quran akan terus disemarakkan di seluruh jabatan serta agensi Kerajaan Negeri pada setiap hari Khamis.

INISIATIF 3: PENGAMBILAN GURU BAHARU DI SEKOLAH AGAMA KERAJAAN JOHOR (SAKJ)

61. Inisiatif ketiga ialah **PENGAMBILAN GURU BAHARU DI SEKOLAH AGAMA KERAJAAN JOHOR (SAKJ)**. Inisiatif ini bertujuan menambah tenaga pengajar seramai **311 orang guru baharu** di SAKJ dengan peruntukan sebanyak **RM 12.8 juta** bagi mengurangkan beban guru sedia ada di **583 buah** sekolah. Inisiatif ini juga dapat meningkatkan keberkesanan aktiviti pembelajaran dan pengajaran yang melibatkan **185 ribu orang murid**.

INISIATIF 4: KENAIKAN ELAUN MENGAJAR DARJAH KHAS

62. Inisiatif keempat ialah **KENAIKAN ELAUN MENGAJAR DARJAH KHAS**. **RM 1.89 juta** diperuntukkan bagi menaikkan kadar elaun mengajar guru Darjah Khas daripada **RM 60 kepada RM 100** berkuatkuasa 1 Januari 2024. Inisiatif ini akan memberi manfaat kepada **1,125 orang guru**.

INISIATIF 5: KURSUS JANGKA PENDEK GURU KAFA

63. Inisiatif kelima pula ialah **KURSUS JANGKA PENDEK GURU KAFA**. Sebagai persediaan bagi memastikan proses pengajaran pendidikan Islam secara berkesan, kursus jangka pendek akan dilaksanakan kepada guru-guru KAFA lantikan baharu.

INISIATIF 6: PEMBERIAN INSENTIF *ONE-OFF* KEPADA PEGAWAI PENGURUSAN MASJID DAN SURAU

64. Inisiatif keenam ialah **PEMBERIAN INSENTIF *ONE OFF* KEPADA PEGAWAI PENGURUSAN MASJID DAN SURAU**. Menghargai peranan pegawai masjid dan surau dalam program-program pengimarahannya, **RM 2.5 juta** diperuntukkan bagi pemberian insentif secara *one off* **RM 500 seorang** kepada Imam, Bilal dan Noja yang melibatkan **4,576 orang penerima**. Insentif ini akan diberikan **pada bulan Mac 2024**.

INISIATIF 7: PEMBANGUNAN SISTEM PENYELARASAN BANTUAN MASJID, SURAU DAN SEKOLAH AGAMA KERAJAAN JOHOR

65. Inisiatif ketujuh ialah **PEMBANGUNAN SISTEM PENYELARASAN BANTUAN MASJID, SURAU DAN SEKOLAH AGAMA KERAJAAN JOHOR**. Sistem ini bertujuan untuk menambah baik sistem penyelarasan sumbangan bantuan kepada masjid, surau dan Sekolah Agama Kerajaan Johor (SAKJ). **RM 64 ribu** diperuntukkan kepada Jabatan Agama Islam Negeri Johor untuk membangunkan sistem pangkalan data yang dapat merekodkan sebarang sumbangan dan mengelakkan berlaku pertindihan kepada penerima sumbangan.

INISIATIF 8: PENGUKUHAN FUNGSI PENGURUSAN HARTA TANAH WAKAF DAN BAITULMAL

66. Seterusnya, menerusi inisiatif kelapan iaitu **PENGUKUHAN FUNGSI PENGURUSAN HARTA TANAH WAKAF DAN BAITULMAL**. Kerajaan Negeri berusaha mengukuhkan fungsi Pengurusan Harta Tanah Wakaf dan Baitulmal. Sehubungan itu, Majlis Agama Islam Negeri Johor (MAINJ) akan **mewujudkan Unit Pentadbiran dan Pembangunan Tanah** dengan peruntukan sebanyak **RM 560 ribu**.

TERAS KEDUA: PEMBANGUNAN EKONOMI

Yang Berhormat Datuk Speaker,

67. Saya beralih pula kepada Teras Kedua iaitu **PEMBANGUNAN EKONOMI**.

Anak Johor berbudi bahasa
Sopan santunnya tersebar sohor
Memacu industri mengangkat bangsa
Ekonomi ditatang majukan Johor

Pakaian tradisi indah berseri
Baju melayu pilihan utama
Perkasa industri membangun negeri
Menjadi matlamat kita bersama

68. Pertumbuhan ekonomi yang pesat, sektor ekonomi yang pelbagai, politik yang stabil serta kemasukan pelaburan berkualiti yang berterusan adalah prasyarat utama jika Johor ingin muncul sebagai kuasa ekonomi utama di rantau ini.
69. Sehubungan dengan itu, pengumuman penubuhan **Johor-Singapore Special Economic Zone (JS-SEZ) dan Special Financial Zone (SFZ)** merupakan katalis kepada pembangunan negeri, selain meneruskan penumpuan kepada sektor-sektor yang telah memacu pertumbuhan ekonomi.
70. Insya-Allah, Memorandum Persefahaman (MoU) di antara Kerajaan Singapura dan Kerajaan Malaysia akan ditandatangani pada 11 Januari 2024. Kerajaan Negeri berharap dan akan berusaha agar perjanjian pula ditandatangani selewat-lewatnya enam bulan dari tarikh tersebut dan pelaksanaannya pada awal tahun 2025.
71. Bagi melengkapkan ekosistem sebagai destinasi pelaburan utama di rantau ini, Kerajaan Negeri berpandangan bahawa *High Speed Rail* (HSR) dan *Light Rail Transit* (LRT) perlu dilaksanakan dengan segera di Negeri Johor ini. Saya berharap Kerajaan Persekutuan akan memberi perhatian kepada permohonan ini.

Yang Berhormat Datuk Speaker,

72. Dalam memastikan Negeri Johor melonjakkan pertumbuhan ekonomi ke satu tahap sebagaimana sasaran menjelang 2030, **5 strategi dan 22 inisiatif** telah dirangka bagi tujuan tersebut.

STRATEGI 1: MEMPERKASA MISI PELABURAN DAN MEMPERTINGKAT KERJASAMA SERANTAU

73. Strategi pertama di bawah teras ini ialah **MEMPERKASA MISI PELABURAN DAN MEMPERTINGKAT KERJASAMA SERANTAU**. Walaupun Negeri Johor telah menerima nilai pelaburan tertinggi di Malaysia pada tahun 2022 dan kekal sebagai antara destinasi utama tahun ini, usaha menarik pelaburan secara berterusan serta menjalinkan kerjasama ekonomi serantau perlu terus dipergiatkan lagi bagi memastikan agenda Maju Johor 2030 dapat direalisasikan.

Maka dengan itu, Kerajaan Negeri akan melaksanakan inisiatif seperti berikut:

INISIATIF 1: MEREALISASIKAN IBRAHIM INTERNATIONAL BUSINESS DISTRICT (IIBD)

74. Inisiatif pertama dalam strategi ini ialah **MEREALISASIKAN IBRAHIM INTERNATIONAL BUSINESS DISTRICT** atau **IIBD**. Kerajaan Negeri komited untuk memastikan usaha ke arah mewujudkan IIBD dapat direalisasikan. **RM 2 juta** diperuntukkan bagi usaha-usaha mengangkat IIBD sebagai Central Business District (CBD) dan hab perniagaan antarabangsa yang berdaya huni.

INISIATIF 2: MISI GALAKAN PELABURAN DAN MEMPERKUKUH HUBUNGAN JARINGAN PELABURAN

75. Inisiatif kedua ialah **MISI GALAKAN PELABURAN DAN MEMPERKUKUH HUBUNGAN JARINGAN PELABURAN**. Bagi mengukuhkan hubungan jaringan perniagaan di peringkat serantau dan global serta meningkatkan tahap keyakinan para pelabur domestik dan antarabangsa, sebanyak **RM 2.2 juta** diperuntukkan untuk meneruskan program **Misi Galakan Pelaburan, Friendly Johor 3.0** dan **Johor Go Global 3.0**. Program ini merupakan sesi libat urus bersama pelabur berpotensi di samping mempromosi Negeri Johor melalui pelbagai platform pengiklanan di lokasi-lokasi tumpuan strategik domestik dan antarabangsa.

INISIATIF 3: JOHOR INSIGHT

76. Inisiatif ketiga pula ialah **JOHOR INSIGHT**. **RM 500 ribu** diperuntukkan bagi penyediaan maklumat pemetaan kawasan industri dan *zoning* serta data pelaburan terkini untuk dipadankan dengan ketersediaan tenaga modal insan rakyat Negeri Johor. Ia menjadi sumber rujukan awal kepada bakal pelabur di Negeri Johor.

INISIATIF 4: PENGANJURAN ACARA BERTARAF ANTARABANGSA

77. Inisiatif keempat pula ialah **PENGANJURAN ACARA BERTARAF ANTARABANGSA**. **RM 3 juta** diperuntukkan bagi mengadakan acara perniagaan bertaraf antarabangsa termasuklah The Green Legacy Johor: International Summit, yang merupakan kesinambungan Asia Pacific Climate Week (APCW) yang telah dilaksanakan baru-baru ini. Kerajaan Negeri Johor juga bersetuju untuk menjadi tuan rumah bagi Mesyuarat Segi Tiga Pertumbuhan Indonesia-Malaysia-Thailand (IMT-GT) dengan kerjasama Kementerian Ekonomi.

STRATEGI 2: MENYEDIAKAN TENAGA KERJA BERKEMAHIRAN DAN BERPENDAPATAN TINGGI

Yang Berhormat Datuk Speaker,

78. Strategi kedua di bawah teras ini ialah **MENYEDIAKAN TENAGA KERJA BERKEMAHIRAN DAN BERPENDAPATAN TINGGI**. Sehingga Oktober 2023, PERKESO melaporkan sebanyak 13 ribu jawatan kosong aktif dicatatkan dalam Negeri Johor yang mana 4 ribu daripadanya memerlukan tenaga kerja yang berkemahiran tinggi. Kerajaan Negeri akan memastikan peluang-peluang yang tersedia akan dapat dimanfaatkan oleh rakyat Johor melalui inisiatif-inisiatif berikut:

INISIATIF 1: MENGOPTIMUMKAN FUNGSI JAWATANKUASA PEMANDU MODAL INSAN NEGERI JOHOR

79. Inisiatif pertama di bawah strategi ini ialah **MENGOPTIMUMKAN FUNGSI JAWATANKUASA PEMANDU MODAL INSAN NEGERI JOHOR**. Jawatankuasa ini berperanan untuk membuat perancangan strategik dalam pengurusan modal insan di Negeri Johor melalui perkongsian dan pengumpulan maklumat dan data berkaitan skop pekerjaan, kemahiran yang diperlukan oleh industri, peluang pekerjaan yang tersedia dan lain-lain yang berkaitan. Bagi mencapai maksud tersebut, jawatankuasa ini dianggotai oleh wakil-wakil daripada jabatan/agensi Kerajaan, wakil-wakil industri, profesional dan akademia yang berkaitan.

INISIATIF 2: GERAK KERJAYA JOHOR (GEGAR 2024)

80. Inisiatif kedua pula ialah meneruskan program **GERAK KERJAYA JOHOR** atau **GEGAR 2024**. Inisiatif ini akan dijalankan dengan peruntukan sebanyak **RM 600 ribu** yang melibatkan kerjasama strategik antara agensi kerajaan dengan penyertaan pemain industri daripada pelbagai sektor untuk pepadanan pekerjaan.

INISIATIF 3: PRO-MAHIR JOHOR

81. Inisiatif ketiga ialah **PROGRAM LATIHAN KEMAHIRAN JOHOR** atau **PRO-MAHIR JOHOR**. **RM 2 juta** diperuntukkan bagi melaksanakan program berikut:

- Pertama : **RM 500 ribu** untuk program latihan *upskilling* dan *reskilling* dalam sektor berkemahiran tinggi seperti automotif, minyak dan gas, aeroangkasa, kesihatan, elektrik, elektronik dan robotik.
- Kedua : **RM 1 juta** untuk **Johor Retrain** bagi menjalankan kursus jangka pendek dengan jaminan pekerjaan selepas tamat kursus.
- Ketiga : **RM 500 ribu** untuk **SMI Care** bagi melatih golongan orang kelainan upaya (OKU), miskin tegar dan mereka yang tiada pendidikan formal dengan jaminan pekerjaan setelah tamat kursus.

STRATEGI 3: MEMACU INDUSTRI PELANCONGAN

Yang Berhormat Datuk Speaker,

82. Strategi ketiga di bawah teras Pembangunan Ekonomi ialah **MEMACU INDUSTRI PELANCONGAN**. Kita amat bertuah kerana Johor memiliki alam semulajadi yang indah dan menarik serta bangunan warisan bersejarah yang mampu menjadi tarikan pelancong dari seluruh dunia. Sehubungan itu, Kerajaan Negeri dengan sukacitanya mengumumkan **Tahun 2026** sebagai **Tahun Melawat Johor**. Usaha ini akan menarik pelancong dari dalam dan luar negara.

83. Untuk makluman, Negeri Johor telah menerima seramai 7.6 juta orang pelancong pada tahun 2019 iaitu sebelum pandemik Covid-19. Pada tahun ini, bilangan pelancong diunjurkan mampu mencapai 8 juta orang. Justeru, melalui Tahun Melawat Johor 2026, Kerajaan Negeri mensasarkan kedatangan **12 juta pelancong** ke Negeri Johor.

INISIATIF 1: PENAMBAHBAIKAN INFRASTRUKTUR PELANCONGAN

84. Inisiatif pertama dalam strategi ini adalah **PENAMBAHBAIKAN INFRASTRUKTUR PELANCONGAN**. Bagi menawarkan produk-produk pelancongan bertaraf antarabangsa, Kerajaan Negeri komited dengan memberi tumpuan kepada pelaksanaan kerja-kerja penyelenggaraan dan menaik taraf infrastruktur sedia ada. Justeru, Kerajaan Negeri dengan kerjasama Kementerian Pelancongan, Seni dan Budaya (MOTAC), PBT serta agensi berkaitan akan memperuntukkan **RM 67.6 juta** bagi melaksanakan projek-projek berikut:

- Pertama : **RM 20 juta** bagi menaik taraf **Jeti Utama dan Jambatan Sungai Ular** di **Taman Negara Johor Pulau Kukup**;
- Kedua : **RM 2.8 juta** bagi menaik taraf kemudahan dan membina baru *canopy roof* di **Kompleks Pelawat Air Terjun Gunung Ledang**;
- Ketiga : **RM 1.2 juta** bagi membina *entrance statement* dan menaik taraf laman tiba **Taman Negara Johor, Tanjung Piai**;
- Keempat : **RM 2 juta** bagi menaik taraf kemudahan infrastruktur penginapan dan kompleks pelawat di **Taman Negara Johor, Endau-Rompin Peta**;
- Kelima : **RM 600 ribu** bagi menaik taraf kemudahan sistem pembentungan di kawasan penginapan dan pembinaan *trail head* di

- Taman Negara Johor, Gunung Ledang** bagi aktiviti pendakian;
- Keenam : **RM 400** ribu bagi membina dan menaik taraf penanda arah baru di setiap Taman Negara Johor;
- Ketujuh : **RM 1.7** juta bagi menaik taraf fasiliti sedia ada di Taman Eko Rimba Sungai Bantang, Segamat dan Gunung Belumut Kluang;
- Kelapan : **RM 600** ribu bagi pembinaan Trek Basikal Gunung atau *Mountain Bike* di Hutan Simpan Gunung Pulai, Kulai untuk penganjuran sukan bertaraf antarabangsa;
- Kesembilan : **RM 9** juta bagi meneruskan projek pembangunan semula **Zoo Johor**;
- Kesepuluh : **RM 4.2** juta bagi menaik taraf Dataran Tasik Bandar Penawar, Kota Tinggi;
- Kesebelas : **RM 3.2** juta bagi menaik taraf Pantai Teluk Mahkota dan Pembangunan River Cruise di Kota Tinggi;
- Kedua belas : **RM 1.8** juta bagi menaik taraf kemudahan asas dan infrastruktur Pantai Air Papan, Jeti Jabatan Laut atau *Floating Jetty*, Bukit Selantai dan Pulau Mawar di Mersing;
- Ketiga belas : **RM 12.2** juta bagi pembangunan semula Kampung Sungai Melayu, Johor Bahru secara menyeluruh;
- Keempat belas : **RM 4.9** juta bagi menaik taraf Tapak Perkhemahan, Taman Permainan, dan Kolam Mandi di Hutan Bandar MBBB dan membina Perkampungan Seramik di Pasir Gudang;
- Kelima belas : **RM 3** juta bagi kerja-kerja konservasi, elektrik dan mekanikal Bangunan Muzium Tokoh Johor;

INISIATIF 2: PENGANJURAN ACARA-ACARA PELANCONGAN JOHOR

85. Inisiatif kedua pula ialah **PENGANJURAN ACARA-ACARA PELANCONGAN JOHOR**. Kejayaan dalam penganjuran beberapa acara pelancongan telah menjadi tarikan kehadiran pelancong ke Johor. Majestic Johor Festival contohnya, telah menerima penghormatan daripada Industri Pelancongan Malaysia apabila menerima anugerah *Gold Award Attractive State Tourism Event*. Oleh itu, **RM 1.7 juta** diperuntukkan bagi meneruskan inisiatif ini.

INISIATIF 3: PEMASARAN & PROMOSI MAJESTIC JOHOR

86. Inisiatif ketiga ialah **PEMASARAN & PROMOSI MAJESTIC JOHOR**. **RM 900 ribu** diperuntukkan bagi tujuan tersebut.

INISIATIF 4: DESTINASI PELANCONGAN MAMPAN

87. Inisiatif berikutnya adalah pelaksanaan **DESTINASI PELANCONGAN MAMPAN**. Selaras dengan Dasar Pelancongan Negara 2020-2030 dan Matlamat Pembangunan Lestari, sebanyak **RM 100 ribu** diperuntukkan untuk memperkasa peranan **Jawatankuasa Kumpulan Penyelarasan Destinasi Pelancongan Mampan** sebagai program rintis yang akan dilaksanakan di daerah Mersing.

STRATEGI 4: KETERJAMINAN BEKALAN MAKANAN

Yang Berhormat Datuk Speaker,

88. Strategi keempat di bawah teras ini ialah **KETERJAMINAN BEKALAN MAKANAN**. Terkesan dengan isu bekalan makanan asas yang melanda negara baru-baru ini, Negeri Johor akan terus memainkan peranan utama sebagai bakul makanan negara. Pada tahun 2022, Johor merupakan penyumbang tertinggi iaitu 17.5 peratus kepada Keluaran Dalam Negara Kasar (KDNK) pertanian negara dan berjaya melahirkan 1,700 usahawan baru dalam Industri Asas Tani. Bagi meneruskan dan memperkasa agenda ini, inisiatif berikut akan dilaksanakan:

INISIATIF 1: PELAN PEMBANGUNAN INDUSTRI PADI DAN BERAS: PERIUK NASI SELATAN

89. Inisiatif pertama dalam strategi ini ialah **PELAN PEMBANGUNAN INDUSTRI PADI DAN BERAS: PERIUK NASI SELATAN**. Johor mempunyai seluas **1,600 hektar** sawah padi yang aktif. Sebanyak **RM 3.9 juta** diperuntukkan oleh Kerajaan Persekutuan dan Kerajaan Negeri untuk meningkatkan produktiviti pengeluaran beras daripada **9 ribu matrik tan kepada 13 ribu matrik tan** yang akan memanfaatkan **700 pesawah** di negeri ini.

INISIATIF 2: PROGRAM PEMBANGUNAN INDUSTRI TERNAKAN AYAM

90. Inisiatif kedua adalah **PROGRAM PEMBANGUNAN INDUSTRI TERNAKAN AYAM**. Negeri Johor telah menyumbang sebanyak **24.4 peratus** daripada keseluruhan pengeluaran ayam di negara ini. Bagi meningkatkan lagi pengeluaran ayam di Negeri Johor, Felda akan membangunkan **Reban Ayam Tertutup** dengan peruntukan sebanyak **RM 12.4 juta** untuk menampung **50 ribu ekor ayam sepusingan** di Felda Air Tawar 3.

INISIATIF 3: MENINGKATKAN PRODUKTIVITI INDUSTRI AGROMAKANAN DAN MERANCAKKAN AKTIVITI EKSPORT BUAH-BUAHAN BERPOTENSI

91. Inisiatif ketiga pula adalah **MENINGKATKAN PRODUKTIVITI INDUSTRI AGROMAKANAN DAN MERANCAKKAN AKTIVITI EKSPORT BUAH-BUAHAN BERPOTENSI**. Inisiatif ini memfokuskan penanaman buah-buahan dengan sasaran peningkatan pengeluaran sebanyak **6 peratus** atau **46 ribu matrik tan** pada tahun hadapan sepertimana berikut:

Pertama : **RM 3.1 Juta** bagi **Program Pembangunan Industri Pengeluaran Makanan Utama dan Berpotensi** yang memberi manfaat kepada **195 usahawan tani**;

Kedua : **RM 1 juta** bagi pelaksanaan **Johor Pineapple Project** untuk meningkatkan produktiviti pengeluaran nanas sehingga **334 ribu matrik tan** melalui mekanisasi agro-teknologi;

- Ketiga : Sebanyak tiga buah fasiliti pemprosesan nangka dan dua buah ladang nangka dari Johor telah berjaya didaftarkan sebagai pengeksport dalam ***Protocol of Phytosanitary Requirements for Export*** untuk tanaman nangka ke China dengan sasaran pengeluaran sehingga **7,800 matrik tan**;
- Keempat : **RM 12.8 juta** bagi melengkapkan projek **Pembangunan Ladang Fertigasi Sistem Perlindungan Hujan** untuk aktiviti penanaman sayuran seperti cili, halia dan kobis.

INISIATIF 4: PEMBANGUNAN INDUSTRI RUMINAN DAN INDUSTRI TENUSU

92. Inisiatif keempat dalam strategi ini adalah **PEMBANGUNAN INDUSTRI RUMINAN DAN INDUSTRI TENUSU**. Inisiatif ini akan mengurangkan kebergantungan penggunaan daging import dan menambah pengeluaran tempatan serta meningkatkan lagi pengeluaran tenusu.

- Pertama : **RM 23 juta** untuk membangunkan 8 unit kandang Fidlot dengan kapasiti 4 ribu ekor lembu pedaging di Pusat Fidlot Ternakan di Felda Ayer Hitam, Kluang yang memanfaatkan **336 orang peserta**;
- Kedua : **RM 850 ribu** untuk membina rumah sembelihan ruminan di PPHP Batu Anam, Segamat;
- Ketiga : **RM 500 ribu** bagi Program Pembangunan Industri Ternakan Ruminan di Negeri Johor;
- Keempat : **Peningkatan pengeluaran susu** daripada **9 juta liter** kepada **17 juta liter setahun** melalui Pembangunan Projek Jemaluang Dairy Valley yang dijangka siap pada awal tahun 2025.

INISIATIF 5: PEMBANGUNAN INDUSTRI AKUAKULTUR & PEMBANGUNAN KOMUNITI

93. Inisiatif kelima adalah **PEMBANGUNAN INDUSTRI AKUAKULTUR & PEMBANGUNAN KOMUNITI**. Kerajaan Negeri mensasarkan peningkatan hasil perikanan sebanyak 62 peratus menjelang tahun 2027.

Pertama : **RM 1.2 juta** bagi Pembangunan Industri Akuakultur dan Pemuliharaan Sumber Perikanan;

Kedua : **RM 700 ribu** bagi Program Pembangunan Aktiviti Komuniti Perikanan untuk meningkatkan sosioekonomi dengan mensasarkan **140 orang nelayan**;

Ketiga : **RM 2.1 juta** bagi pembinaan Kolam Ternakan Udang di PPK Johor Bahru Selatan;

Keempat : **RM 2.5 juta** bagi bantuan bernilai **RM 300** dalam bentuk peralatan kepada setiap nelayan kategori Zon A yang akan memanfaatkan **8,445 orang penerima**.

INISIATIF 6: MENGOPTIMUMKAN PENGGUNAAN TANAH PERTANIAN

94. Inisiatif keenam pula ialah **MENGOPTIMUMKAN PENGGUNAAN TANAH PERTANIAN**. Dalam usaha Kerajaan Negeri meningkatkan produktiviti tanaman makanan terutamanya cili dan halia tua, tanah pertanian seluas **28,887 ekar** akan diusahakan secara optimum.

95. Selain itu, tanah seluas 1 ribu ekar di Projek Pertanian Moden (PPM) Kluang akan diusahakan dengan tanaman cili dan halia tua. Sebanyak **RM 4.8 juta** telah diluluskan oleh Kerajaan Persekutuan bagi tahun 2024 bagi melengkapkan infrastruktur di PPM Kluang.

96. Sebagai tambahan, Kerajaan Negeri juga memperuntukkan sebanyak **RM 1 juta** bagi menggalakkan usaha-usaha

meningkatkan penggunaan teknologi dalam aktiviti pertanian di Johor.

STRATEGI 5: PEMBANGUNAN USAHAWAN

Yang Berhormat Datuk Speaker,

97. Strategi kelima di bawah teras Pembangunan Ekonomi ialah **PEMBANGUNAN USAHAWAN**. Johor merekodkan bilangan pertubuhan PMKS kedua tertinggi iaitu sebanyak **127 ribu** yang mana menyumbang **11 peratus** kepada keseluruhan pertubuhan PMKS dalam Malaysia. Bagi meningkatkan kompetensi komuniti usahawanan sedia ada dan melonjakkan usahawan yang berpotensi ke tahap yang lebih tinggi, inisiatif-inisiatif yang akan dilaksanakan adalah sebagaimana berikut:

INISIATIF 1: MENINGKATKAN PENDAPATAN USAHAWAN MIKRO

98. Inisiatif pertama dalam strategi ini ialah **MENINGKATKAN PENDAPATAN USAHAWAN MIKRO**. Melalui Program **BRJohorNiaga**, sehingga Oktober 2023, seramai **211 usahawan** telah mendapat manfaat dan ia akan diteruskan lagi pada tahun 2024. Sebagai tambahan, Kerajaan Negeri memperuntukkan **RM 4 juta** bagi pelaksanaan program-program berikut:

Pertama : **RM 2 juta** diperuntukkan untuk melaksanakan **Geran Usahawan Maju Johor atau GUMJ 2024** bagi membantu penyediaan peralatan dan pengembangan premis perniagaan yang memberi manfaat kepada **usahawan** sedia ada;

Kedua : **RM 1 juta** untuk melaksanakan **Misi Jejak Perusahaan Mikro Kecil dan Sederhana (PMKS) Johor** yang mensasarkan seramai **280 usahawan PMKS** baru di **56 DUN**;

Ketiga : **RM 1 juta** bagi melaksanakan inisiatif **Penceriaan Bazar Karat** dan beberapa lokasi lain bagi menarik lebih ramai kehadiran pengunjung.

INISIATIF 2: MELAHIRKAN USAHAWAN BERPENGETAHUAN DAN BERKEMAHIRAN

99. Inisiatif kedua ialah **MELAHIRKAN USAHAWAN BERPENGETAHUAN DAN BERKEMAHIRAN**. Bagi meletakkan komuniti usahawan ke satu tahap yang lebih berdaya saing, **RM 1 juta** diperuntukkan untuk melaksanakan **55 siri** kursus dan latihan secara fizikal dengan sasaran seramai **2 ribu usahawan**.

INISIATIF 3: PEMASARAN PRODUK DAN PERKHIDMATAN USAHAWAN JOHOR KE PERINGKAT DOMESTIK DAN GLOBAL

100. Inisiatif ketiga pula ialah **PEMASARAN PRODUK DAN PERKHIDMATAN USAHAWAN JOHOR KE PERINGKAT DOMESTIK DAN GLOBAL**. **RM 3.3 juta** disediakan bagi memasarkan produk usahawan-usahawan Negeri Johor ke seluruh negara dan rantau Asia.

Pertama : **RM 1 juta** diperuntukkan untuk **Festival Keusahawanan Maju Johor** yang mensasarkan penglibatan **200 usahawan** dan kehadiran **80 ribu pengunjung**;

Kedua : **RM 1.5 juta** diperuntukkan untuk **Pengembangan Produk Usahawan Johor** yang akan memberi manfaat kepada **500 usahawan** bagi penglibatan usahawan Johor dalam ekspo dan karnival di peringkat tempatan dan antarabangsa;

Ketiga : **RM 800 ribu** diperuntukkan untuk meneruskan **Program Jelajah Usahawan Johor** dengan penambahbaikan kaedah pelaksanaannya.

INISIATIF 4: MENGUKUHKAN GERAKAN KOPERASI NEGERI JOHOR

101. Inisiatif keempat ialah **MENGUKUHKAN GERAKAN KOPERASI NEGERI JOHOR**. Seiring dengan pembangunan ekonomi yang positif dalam Negeri Johor, sumbangan gerakan koperasi Negeri Johor yang dianggotai **463 ribu anggota** tidak

pernah dilupakan. Justeru, Kerajaan Negeri memperuntukkan **RM 300 ribu** bagi pemasaran produk-produk koperasi.

INISIATIF 5: PEMBERDAYAAN WANITA DAN GOLONGAN SASAR

102. Inisiatif kelima adalah **PEMBERDAYAAN WANITA DAN GOLONGAN SASAR**. **RM 1 juta** diperuntukkan untuk melatih dan membantu 1 ribu ibu tunggal, B40 dan OKU memulakan perniagaan dengan mensasarkan peningkatan pendapatan mereka sehingga 30 peratus daripada pendapatan asal.

TERAS KETIGA: JARINGAN KESELAMATAN SOSIAL

Yang Berhormat Datuk Speaker,

103. Teras ketiga Agenda Maju Johor ialah **JARINGAN KESELAMATAN SOSIAL**.

Merah biru harimau selatan
Gelaran diberi sepanjang hayat
Santuni yang lemah, juga yang rentan
Memakmur negeri membantu rakyat

104. Teras ini memberi fokus kepada pelbagai perkara yang mensejahterakan rakyat termasuklah perumahan, kesihatan, kebajikan dan perpaduan. Sehubungan itu, Kerajaan Negeri berusaha memperkasa jaringan keselamatan sosial yang merangkumi **4 strategi** dan **24 inisiatif** bagi menangani ebagai golongan miskin dan rentan.

STRATEGI 1: JOHOR BERKEBAJIKAN

105. Strategi pertama di bawah teras ketiga ialah **JOHOR BERKEBAJIKAN**. Kerajaan Negeri memahami realiti kehidupan masyarakat yang terkesan dengan kos sara hidup yang tinggi. Justeru itu, usaha-usaha untuk membantu setiap lapisan rakyat yang terkesan akan diteruskan dengan inisiatif seperti berikut:

INISIATIF 1: BANTUAN KEBAJIKAN SOSIAL

106. Inisiatif pertama dalam strategi ini ialah **BANTUAN KEBAJIKAN SOSIAL**. Kerajaan Negeri amat menginsafi

tentang kesusahan hidup rakyat masa kini terutamanya golongan B40. Justeru, Kerajaan Negeri dan Kerajaan Persekutuan melalui Jabatan Kebajikan Masyarakat (JKM) memperuntukkan sebanyak **RM 298 juta** yang akan dimanfaatkan oleh **55,700 orang penerima** yang layak.

INISIATIF 2 : JOHOR KASIH

107. Inisiatif kedua pula ialah **JOHOR KASIH**. **Johor Kasih** merupakan program Pembasmian Miskin Tegar di Negeri Johor. Program berkonsepkan '**keluarga angkat**' ini akan melibatkan pemimpin di pelbagai peringkat, termasuk diri saya, Ahli Mesyuarat Kerajaan Negeri, Ahli-Ahli Dewan Undangan Negeri, Pegawai-Pegawai Daerah, Ketua-Ketua Jabatan, Ahli-Ahli Majlis PBT, Penghulu dan Ketua-Ketua Kampung. **RM 3.2 juta** diperuntukkan bagi inisiatif ini yang akan memberi manfaat kepada **2,647 Ketua Isi Rumah Miskin Tegar**. Kita semua yang berada dalam Dewan ini akan bertanggungjawab menjaga dan berusaha untuk mengeluarkan mereka daripada kumpulan ini.

INISIATIF 3: JUALAN KASIH JOHOR

108. Inisiatif seterusnya ialah **JUALAN KASIH JOHOR**. Kerajaan Negeri terus komited dalam membantu mengurangkan kos sara hidup rakyat. Sebanyak **RM 5 juta** diperuntukkan bagi pemberian subsidi harga barang terutamanya menjelang musim perayaan Aidilfitri, Tahun Baru Cina, Deepavali dan banyak lagi di pasar-pasar tani, pasar awam serta lokasi-lokasi yang terpilih. Program ini mensasarkan **800 ribu penerima manfaat** di **300 lokasi** menerusi kaedah **pengurangan harga yang signifikan** bagi produk makanan terpilih seperti ayam, telur, minyak masak dan ikan.

INISIATIF 4 : PEMBERDAYAAN DAN KELESTARIAN WANITA NEGERI JOHOR

109. Inisiatif keempat ialah **PEMBERDAYAAN DAN KELESTARIAN WANITA NEGERI JOHOR**. **RM 770 ribu** diperuntukkan bagi pelaksanaan **Konvensyen Pemerkasaan Wanita, Keluarga dan Masyarakat** Peringkat Kebangsaan dan pelaksanaan **WCare Johor** iaitu **Women Care Reproductive Awareness** yang akan memanfaatkan **8 ribu wanita** di Negeri Johor.

INISIATIF 5: SOKONGAN SOSIAL, KEBAJIKAN DAN PEMBANGUNAN KANAK-KANAK

110. Inisiatif kelima pula ialah **SOKONGAN SOSIAL, KEBAJIKAN DAN PEMBANGUNAN KANAK-KANAK**. Kanak-kanak adalah aset dan prospek masa hadapan yang berharga. Kerajaan Negeri menerusi YPKDT dan KEMAS akan melaksanakan inisiatif berikut:

- Pertama : **RM593 ribu** diperuntukkan bagi menaik taraf dan membaik pulih bangunan sedia ada bagi **Jauhar Childcare Center** iaitu **JCC** di **PPR Desa Mutiara, RSK Taman Cendana** dan bagi kerja-kerja awal pembangunan **JCC Kluang** serta pengoperasian **JCC pertama** dalam komuniti di **PPR Melana**;
- Kedua : **RM 2 juta** bagi meneruskan inisiatif **Anak Angkat Makmur Johor** bagi membela nasib **1,300 orang** kanak-kanak dan remaja yang kehilangan ibu bapa akibat pandemik Covid-19;
- Ketiga : **RM 700 ribu** diperuntukkan bagi **bantuan langsung** dan **geran pentadbiran** kepada **30 Pusat Jagaan dan Rumah Kebajikan Anak Yatim berdaftar** yang akan memanfaatkan **1,289 orang anak yatim**;
- Keempat : **RM 1.8 juta** diperuntukkan bagi **Program IQFA'** iaitu Program Iqra' dan Fardhu Ain di **550 kelas TABIKA KEMAS** Negeri Johor yang melibatkan seramai **11 ribu kanak-kanak** berusia **5 hingga 6 tahun**.

INISIATIF 6 : PEMBERDAYAAN DAN KEMANDIRIAN ORANG KURANG UPAYA (OKU) & WARGA EMAS

111. Inisiatif keenam pula ialah **PEMBERDAYAAN DAN KEMANDIRIAN ORANG KURANG UPAYA (OKU) & WARGA EMAS**. Golongan OKU dan warga emas juga diberikan perhatian oleh Kerajaan Negeri. **RM 1.55 juta** diperuntukkan:

- Pertama : **RM 1 juta** bagi **kerja-kerja menaik taraf dan menyelenggara 13 buah PDK dan 8 buah PAWE;**
- Kedua : **RM 300 ribu** untuk mengadakan tiga program utama iaitu ***Employer Job Coaching Assistance Skill Training, Kursus Asas Bahasa Isyarat Malaysia*** dan ***Disabled Skills & Career Course;***
- Ketiga : **RM 250 ribu** untuk pelaksanaan **Penarafan Bintang Pusat Jagaan** bagi penilaian pengurusan pusat jagaan warga emas, OKU dan kanak-kanak.

INISIATIF 7: BANTUAN KEBAJIKAN UMMAH

112. Inisiatif ketujuh ialah pemberian **BANTUAN KEBAJIKAN UMMAH**. Kerajaan Negeri menerusi Majlis Agama Islam Negeri Johor (MAINJ) amat prihatin dengan kesejahteraan hidup rakyat yang menghadapi masalah kesihatan kronik. Sejumlah **RM 91.3 juta** diperuntukkan bagi menyantuni individu yang terjejas kesihatan termasuklah buah pinggang, masalah jantung dan penyakit kronik lain seperti berikut;

- Pertama : **RM 68 juta** bagi **bantuan perubatan dialisis dan membina tapak Fistula** yang melibatkan lebih **4,200 pesakit buah pinggang;**
- Kedua : **RM 22.8 juta** bagi membantu **kos rawatan pesakit** daripada keluarga yang kurang berkemampuan;
- Ketiga **RM 500 ribu** bagi memberi bantuan perubatan kepada individu kurang berkemampuan yang mengalami masalah **sakit jantung** untuk menerima rawatan di Institut Jantung Negara (IJN).

113. MAINJ juga menyediakan Bantuan Sara Hidup berjumlah **RM 79 juta** untuk membantu **17 ribu asnaf dari kumpulan fakir dan miskin.**

INISIATIF 8: PENINGKATAN EKONOMI DAN TARAF HIDUP

114. Inisiatif kelapan adalah **PENINGKATAN EKONOMI DAN TARAF HIDUP**.

- Pertama : **RM 3.3 juta** diperuntukkan bagi **membangunkan ekonomi** golongan asnaf keluar daripada kepompong kemiskinan;
- Kedua : **RM 240 ribu** bagi **Inisiatif Bantuan Berdikari** yang akan memberi manfaat kepada **100 penerima** sebagai modal memulakan perniagaan;
- Ketiga : **RM 2 juta** bagi **Bantuan Bencana Alam** kepada mangsa yang terlibat.

STRATEGI 2 : MEMPERKASA PERUMAHAN RAKYAT

Yang Berhormat Datuk Speaker,

115. Strategi kedua di bawah teras Jaringan Keselamatan Sosial ialah **MEMPERKASA PERUMAHAN RAKYAT**. Kerajaan Negeri sentiasa berusaha untuk menyediakan rumah mampu milik yang berkualiti kepada rakyat. Oleh itu, beberapa inisiatif akan dilaksanakan untuk memperkasa perumahan rakyat di Negeri Johor.

INISIATIF 1: PROGRAM PERUMAHAN RAKYAT (PPR)

116. Inisiatif pertama dalam strategi ini adalah **PROGRAM PERUMAHAN RAKYAT**. Bagi memastikan keperluan Program Perumahan Rakyat (PPR) dapat dipenuhi, Kerajaan Persekutuan dan Kerajaan Negeri akan melaksanakan projek-projek seperti berikut:

- Pertama : **RM 72 juta** bagi pembinaan baru **PPR Larkin** sebanyak **300 unit**;
- Kedua : **RM 115 juta** bagi pembinaan baru **PPR Kluang** sebanyak **600 unit**;

- Ketiga : **RM 64.25 juta** bagi melaksanakan **kerja-kerja penyelenggaraan dan pembaikan PPR dan RSK**;
- Keempat : **RM 4.55 juta** bagi pelaksanaan **kontrak perkhidmatan kawalan keselamatan dan penyelenggaraan lif**;
- Kelima : **RM 10.4 juta** bagi pelaksanaan **kontrak pengurusan fasiliti**;
- Keenam : **RM 7.5 juta** bagi **Program Penyelenggaraan Perumahan** di Negeri Johor.

INISIATIF 2: PENYEDIAAN RUMAH MAMPU MILIK

117. Inisiatif kedua ialah **PENYEDIAAN RUMAH MAMPU MILIK**. Rumah adalah institusi penting dan seharusnya menjadi keutamaan dalam apa jua keadaan. Sasaran Kerajaan Negeri dalam pembinaan Rumah Mampu Milik sehingga tahun 2026 adalah sebanyak **30 ribu unit**.
118. Bagi tahun 2022 dan 2023, Kerajaan Negeri telah membina 7,735 unit. Oleh yang demikian, melalui jawatankuasa khas iaitu *Planning Design Review Committee* atau PDRC, Kerajaan Negeri berjaya mendapatkan komitmen pemaju perumahan di Negeri Johor untuk menyiapkan **5,123 rumah mampu milik** pada tahun 2024.

INISIATIF 3: BANTUAN KEMASUKAN RUMAH

119. Inisiatif ketiga ialah **BANTUAN KEMASUKAN RUMAH**. Bagi membantu persiapan memasuki rumah baru, Kerajaan Negeri akan menyediakan **RM 1 ribu** kepada pembeli RMMJ yang telah menerima kunci. **RM 3 juta** akan diperuntukkan bagi memanfaatkan **3 ribu orang penerima**.

INISIATIF 4: RESIDENSI BANGSA JOHOR

120. Inisiatif keempat pula ialah **RESIDENSI BANGSA JOHOR (RBJ)**. Pembinaan RBJ melalui kerjasama PKPJ dan Syarikat Berkaitan Kerajaan Negeri (GLC) ini akan dilaksanakan sebagaimana berikut:

- Pertama : **RM 665 juta** bagi membina **2,634 unit** Perumahan Iskandar Puteri Bangsa Johor melalui konsep *Public Private Partnership* (PPP) oleh PKPJ dan GLC;
- Kedua : **RM 56 juta** bagi membina **147 unit RBJ Tangkak**;
- Ketiga : **RM 54 juta** bagi membina **140 unit RBJ Yong Peng**;
- Keempat : **RM 18.8 juta** bagi membina **50 unit RBJ Simpang Renggam**;

INISIATIF 5: RUMAH TRANSIT BANGSA JOHOR (RTBJ)

121. Inisiatif kelima pula ialah perluasan **RUMAH TRANSIT BANGSA JOHOR (RTBJ)**. Untuk makluman, sebanyak **92 unit** di **Rumah Transit Kempas** dan **216 unit** di **Bandar Putra Kulai** telah dilaksanakan pada tahun 2023. Pada tahun 2024 pula, **RM 15 juta** diperuntukkan untuk penyediaan **130 unit** perumahan transit di **Taman Tasik Indah, Kluang** dan **Taman Mutiara Rini, Johor Bahru**.

INISIATIF 6: PEMBANGUNAN RUMAH KASIH JOHOR

122. Inisiatif keenam ialah **PEMBANGUNAN RUMAH KASIH JOHOR**. Kerajaan Negeri memahami bahawa terdapat rakyat yang memiliki tanah tetapi tidak mampu untuk membina rumah. Dalam usaha untuk merealisasikan hasrat mereka untuk memiliki rumah kediaman yang selesa, sejumlah **RM 6.5 juta** telah diperuntukkan pada tahun 2023 bagi membina **50 unit Rumah Kasih Johor**.

123. Pada tahun 2024 pula, sebanyak **RM 17 juta** diperuntukkan bagi membina sebanyak **120 unit Rumah Kasih Johor** di seluruh Negeri Johor.

INISIATIF 7: REJUVENASI FLAT AWAM NEGERI JOHOR

124. Inisiatif seterusnya ialah **REJUVENASI FLAT AWAM NEGERI JOHOR**. **RM 14.1 juta** diperuntukkan untuk penyelenggaraan flat awam yang terletak di Flat Haji Manan, Flat Taman Bersatu,

Kluang, Flat Impian Emas, Iskandar Puteri, Rumah Pangsa Tangkak dan Rumah Pangsa Kulai.

INISIATIF 8: MEMBAIK PULIH RUMAH RAKYAT

125. Inisiatif kelapan ialah **MEMBAIK PULIH RUMAH RAKYAT**. Sejumlah **RM 13.8 juta** diperuntukkan bagi kerja-kerja membaik pulih rumah golongan miskin.

INISIATIF 9: TABUNG BANTUAN BENCANA DAN KECEMASAN FLAT AWAM

126. Inisiatif kesembilan dalam strategi kedua ini ialah **TABUNG BANTUAN BENCANA DAN KECEMASAN FLAT AWAM**. **RM 3 juta** diperuntukkan pada tahun 2023 untuk membantu mangsa bencana dan memulihkan flat yang dilanda ribut. Bagi tahun 2024 pula, Kerajaan Negeri menambah peruntukan kepada **RM 10 juta** untuk **Tabung Bantuan Bencana dan Kecemasan Flat Awam Negeri Johor**.

STRATEGI 3: MENINGKATKAN KUALITI KESIHATAN BANGSA JOHOR

Yang Berhormat Datuk Speaker,

127. Strategi ketiga di bawah teras ini ialah ialah **MENINGKATKAN KUALITI KESIHATAN BANGSA JOHOR**.

INISIATIF 1: APLIKASI PERKHIDMATAN DIGITAL PESAKIT LUAR

128. Inisiatif pertama dalam strategi ini ialah membangunkan **APLIKASI PERKHIDMATAN DIGITAL PESAKIT LUAR** yang dikenali sebagai **Smart Que System (SQS)** dengan peruntukan sebanyak **RM 1 juta** bagi menyelaras janji temu dan pengurusan giliran pesakit di **Poliklinik Pakar Hospital Sultanah Aminah, Johor Bahru**.

129. Melalui SQS, masa menunggu berjumpa doktor sehingga selesai mengambil ubat yang secara purata pada ketika ini mengambil masa **3 hingga 6 jam** akan **dikurangkan** kepada **1 hingga 2 jam**. Inisiatif ini akan memanfaatkan **57 ribu pesakit sebulan** dan akan diperluaskan ke hospital-hospital lain pada masa akan datang.

130. Kerajaan Negeri juga akan memperuntukkan **RM 222 ribu** bagi penyediaan **WiFi Premium Maju Johor** dengan kelajuan minimum **1Gbps** untuk setiap *hotspot* di ruang menunggu klinik pakar, farmasi dan bahagian kecemasan di **Hospital Sultanah Aminah, Hospital Sultan Ismail, Hospital Sultanah Nora, Batu Pahat** dan **Hospital Enche Besar Hajjah Kalsom, Kluang**.

INISIATIF 2: SISTEM PENYAMPAIAN KESIHATAN

131. Inisiatif kedua ialah **SISTEM PENYAMPAIAN KESIHATAN**. Bagi mengurangkan kesesakan di 11 hospital dan 99 klinik kesihatan, **RM 900 ribu** diperuntukkan bagi menampung kos **Perkhidmatan Ubat Melalui Pos secara percuma** kepada Bangsa Johor melibatkan sebanyak **160 ribu parcel**.
132. Seterusnya, **RM 170 ribu** diperuntukkan bagi meneruskan **Projek Locker4u** yang akan memanfaatkan **7 ribu pesakit**.

INISIATIF 3 : KLINIK KESIHATAN BERGERAK

133. Inisiatif ketiga ialah **KLINIK KESIHATAN BERGERAK**. Kerajaan Negeri dengan kerjasama Yayasan Mohamed Noah, JKN, PAJ, UiTM dan NGO akan memperkenalkan perkhidmatan ini secara berperingkat ke 56 kawasan DUN dengan menawarkan perkhidmatan pemeriksaan kesihatan, rawatan asas, dan pergigian kepada seluruh rakyat Johor dengan peruntukan berjumlah **RM1.3 juta**.

INISIATIF 4 : BANGSA JOHOR BEBAS DADAH

134. Inisiatif keempat ialah **BANGSA JOHOR BEBAS DADAH**. **RM 1.13 juta** diperuntukkan bagi **menghijaukan 17 Kawasan Berisiko Tinggi Dadah** di seluruh Negeri Johor.

INISIATIF 5 : PROGRAM JOHOR BEBAS DENGGI

135. Inisiatif kelima dalam strategi ini adalah **PROGRAM JOHOR BEBAS DENGGI**. **RM 250 ribu** diperuntukkan untuk melaksanakan pelbagai aktiviti kesedaran dan pencegahan Denggi.

STRATEGI 4 - PENGUKUHAN PERPADUAN, PATRIOTISME DAN JATI DIRI BANGSA JOHOR

Yang Berhormat Datuk Speaker,

136. Strategi keempat di bawah teras ini ialah **PENGUKUHAN PERPADUAN, PATRIOTISME DAN JATI DIRI BANGSA JOHOR.**

INISIATIF 1: JOHOR HARMONI

137. Inisiatif pertama dalam strategi ini ialah **JOHOR HARMONI.** Perpaduan Bangsa Johor merupakan tunjang kepada keharmonian negeri. Justeru, **RM 850 ribu** diperuntukkan untuk inisiatif seperti berikut:

- Pertama : **RM 500 ribu** bagi **Program Silang Budaya** yang mencakupi simfoni gabungan rentak muzik, tarian dan nyanyian tradisi pelbagai kaum yang akan melibatkan **3 ribu orang** pelajar sekolah rendah dan kelab rukun negara;
- Kedua : **RM 150 ribu** bagi **Program Keselamatan Sosial dan Kejiranan** kepada **seribu Ahli SRS** untuk mereka memberi bantuan awal jika berlaku bencana dalam komuniti;
- Ketiga : **RM 200 ribu** bagi **Program Keamanan Antara Penganut Agama** melalui **“Program Interfaith Harmony”** yang akan dilaksanakan bersama komuniti berbilang agama.

INISIATIF 2 : MENYANTUNI MASYARAKAT TIONGHOA, INDIA DAN LAIN-LAIN

138. Inisiatif kedua ialah **MENYANTUNI MASYARAKAT TIONGHOA, INDIA DAN LAIN-LAIN.** Sebanyak **RM 12 juta** akan diperuntukkan khas untuk pembangunan kerohanian serta kebajikan masyarakat Tionghoa, India dan lain-lain.

139. Terdapat peribahasa mandarin yang berbunyi dengan izin : "再穷不能穷教育" yang bermaksud "Walau apa pun keadaan, kita tidak boleh berhenti membiayai pendidikan"

140. Menurut peribahasa Tamil pula, “கற்றோர்க்குச் சென்ற இடமெல்லாஞ்சிறப்பு.” yang bermaksud orang yang berilmu akan disanjung tinggi di mana-mana jua.
141. Justeru itu, **RM 3 juta** diperuntukkan melalui Yayasan Sultanah Fatimah dan Yayasan Sultanah Rogayah bagi bantuan persekolahan yang akan memanfaatkan **6 ribu pelajar** Tionghoa dan India yang kurang berkemampuan.
142. Selain itu, **RM 1 juta** akan disalurkan kepada Kolej Universiti Selatan yang akan memberi manfaat **kepada 500 pelajar**.

TERAS KEEMPAT : KEMUDAHAN DAN KEPERLUAN ASAS

Yang Berhormat Datuk Speaker,

143. Teras keempat ialah **KEMUDAHAN DAN KEPERLUAN ASAS**.

DUN Johor di Kota Iskandar
Tempat pemimpin mencurah khidmat
Kesetiaan dihulur janji disandar
Kemudahan asas sama dinikmat

144. Kerajaan Negeri sentiasa komited untuk menyediakan dan menambah baik infrastruktur awam dalam memastikan Bangsa Johor menikmati kualiti hidup yang lebih selesa. Justeru, Kerajaan Negeri akan melaksanakan **5 strategi** dan **13 inisiatif** dalam memperkasakan kemudahan dan keperluan asas di Negeri Johor.

STRATEGI 1: MEMPERLUAS JARINGAN JALAN RAYA DAN PERHUBUNGAN

145. Strategi pertama di bawah teras ini ialah **MEMPERLUAS JARINGAN JALAN RAYA DAN PERHUBUNGAN**. Kerajaan Negeri amat prihatin tentang isu jalan raya kerana ia merupakan medium kesalinghubungan utama di Johor.

INISIATIF 1 : PEMBINAAN JALAN BAHARU PERSEKUTUAN

146. Inisiatif pertama di bawah strategi ini ialah **PEMBINAAN JALAN BAHARU PERSEKUTUAN**. Selain daripada Projek

Pelebaran Lebuhraya Utara-Selatan (PLUS) daripada 4 kepada 6 lorong dilanjutkan dari Sedenak ke Simpang Renggam, Kerajaan Negeri menyambut baik dan menghargai kelulusan Kerajaan Persekutuan untuk projek berimpak tinggi sepertimana berikut:

- Pertama : **RM 160 juta** bagi Pembinaan Jalan Pintas Tangkak dari Kolej Matrikulasi Johor ke Kawasan Perindustrian Tangkak;
- Kedua : **RM 130 juta** bagi Pembinaan Jalan Pintas Mersing dari Jalan Felda Nitar ke Persimpangan Air Merah dan Persimpangan Siapu;
- Ketiga **RM 120 juta** bagi menaik aras Jalan Kota Tinggi - Mersing;
- Keempat **RM 42 juta** bagi kerja awalan menaik taraf jalan dari UTM ke Persimpangan Pulau Perdana.

INISIATIF 2: PEMBINAAN JALAN SERTA JAMBATAN NEGERI

147. Inisiatif kedua pula ialah **PEMBINAAN JALAN SERTA JAMBATAN NEGERI**. Bagi menambah infrastruktur jalan dan jambatan, Kerajaan Negeri akan membina serta menaik taraf jalan dan jambatan baru antaranya sepertimana berikut:

- Pertama : **RM 4.1 juta** bagi membina laluan baru dari Kg. Rahmat dan Estet Sri Gading, Batu Pahat;
- Kedua : **RM 3 juta** bagi menaik taraf Jalan Kluang – Paloh – Yong Peng;
- Ketiga : **RM 4.5 juta** bagi menaik aras jalan yang kerap berlaku banjir di Jalan Perani, Kota Tinggi;
- Keempat : **RM 5.4 juta** bagi menaik taraf persimpangan dan membina jambatan di Jalan Tongkang Pechah - Jalan Bindu, Batu Pahat;

Kelima : **RM 8 juta** bagi menggantikan jambatan sempit di Serom 1, Tangkak.

INISIATIF 3 : PENYELENGGARAAN JALAN

148. Inisiatif ketiga yang akan dilaksanakan ialah **PENYELENGGARAAN JALAN**. Kerajaan Negeri bersama Kerajaan Persekutuan akan melaksanakan:

Pertama : **RM 635 juta** bagi penyelenggaraan jalan negeri, jalan PBT, jalan kampung dan jalan pertanian sepanjang **25,210 km**;

Kedua : **RM 1 juta** bagi menaik taraf garisan jalan kepada jenis *glow in the dark* untuk meningkatkan aspek keselamatan pengguna jalan raya di kawasan gelap dan kerap berlaku kemalangan.

INISIATIF 4 : PEMASANGAN LAMPU JALAN

149. Inisiatif keempat yang akan dilaksanakan ialah **PEMASANGAN LAMPU JALAN**. Kerajaan Negeri dan Kementerian Kemajuan Desa dan Wilayah (KKDW) akan melaksanakan;

Pertama : **RM 5.6 juta** bagi pemasangan **2,230 unit lampu jalan LED** di kawasan luar bandar;

Kedua : **RM 2 juta** bagi pemasangan **100 lampu amber dan 200 lampu solar LED** di kawasan gelap dan persimpangan berbahaya.

INISIATIF 5 : MEMBENTUK TASK FORCE PROJEK BERIMPAK TINGGI

150. Inisiatif kelima pula ialah **MEMBENTUK TASK FORCE PROJEK BERIMPAK TINGGI**. Bagi memastikan projek-projek utama seperti pelebaran Lebuhraya PLUS dan lorong memotong Lebuhraya SDE siap mengikut jadual, *taskforce* ini

akan menyelaraskan isu berbangkit dan memastikan kelulusan jabatan teknikal dapat diperolehi dengan kadar segera.

STRATEGI 2 : PENGANGKUTAN AWAM DAN CAPAIAN INTERNET

Yang Berhormat Datuk Speaker,

151. Strategi kedua di bawah teras ini ialah **PENGANGKUTAN AWAM DAN CAPAIAN INTERNET**. Selain infrastruktur jalan, kemudahan pengangkutan awam dan capaian internet juga akan ditingkatkan untuk kesejahteraan rakyat.

INISIATIF 1: PENYEDIAAN PERKHIDMATAN BAS PERCUMA

152. Inisiatif pertama di bawah strategi ini ialah penyediaan **PERKHIDMATAN BAS MUAFAKAT JOHOR** atau **BMJ** secara percuma. Sehingga 30 September 2023, seramai **1.35 juta orang** telah menggunakan BMJ ini. Pada tahun ini, Kerajaan Negeri telah menyelaraskan **13 perubahan laluan bas** bagi memastikan penggunaan BMJ dapat dioptimumkan. Oleh itu, Kerajaan Negeri dan PBT akan meneruskan perkhidmatan BMJ di 69 laluan dengan peruntukan sebanyak **RM 26.5 juta**.

153. Selain itu, Perkhidmatan *Shuttle Bus* Di Hospital Sultan Ismail (HSI) dan Hospital Sultanah Aminah (HSA) juga akan diteruskan dengan peruntukan sebanyak **RM 586 ribu** yang telah memanfaatkan **47,019 orang** sejak 1 Januari 2023.

INISIATIF 2 : MENAIK TARAF CAPAIAN INTERNET

154. Inisiatif kedua pula ialah **MENAIK TARAF CAPAIAN INTERNET**. Bagi membolehkan Bangsa Johor menikmati capaian internet yang lebih pantas dan meluas, **RM 330 ribu** diperuntukkan bagi membiayai inisiatif **WiFi Premium Maju Johor**. Ia melibatkan 25 hotspot di kawasan Program Perumahan Rakyat (PPR) yang memanfaatkan **12,700 keluarga**. Kadar kelajuan juga ditambah dari **30Mbps kepada 2Gbps**.

155. Perkhidmatan **WiFi Premium Maju Johor** juga akan diperluaskan lagi di premis kerajaan yang menjadi tumpuan pelanggan seperti ruang menunggu kaunter pendaftaran

Pejabat Tanah Daerah Johor Bahru dan Pejabat Tanah Daerah Kulai serta ruang menunggu **Kompleks Kastam, Imigresen dan Kuarantin (CIQ)** di **Bangunan Sultan Iskandar dan Terminal Bas Larkin**.

156. Bagi aspek ketersambungan digital, **rangkaian 5G** diunjurkan akan mencapai **83 peratus** liputan di kawasan berpenduduk pada akhir tahun ini. Sebagai sebuah negeri yang sedang pesat membangun, Kerajaan Negeri menyeru agar Kerajaan Persekutuan turut memberi tumpuan kepada peningkatan kualiti liputan serta perluasan rangkaian di kawasan infrastruktur utama seperti lebuh raya, kawasan perindustrian baru dan destinasi pelancongan utama.

STRATEGI 3: MENAIK TARAF KEMUDAHAN BEKALAN AIR DAN TENAGA

Yang Berhormat Datuk Speaker,

157. Strategi ketiga di bawah teras ini ialah **MENAIK TARAF KEMUDAHAN BEKALAN AIR DAN TENAGA**.

INISIATIF 1: MENAIK TARAF 6 EMPANGAN DI NEGERI JOHOR

158. Inisiatif pertama dalam strategi ini ialah **MENAIK TARAF 6 EMPANGAN DI NEGERI JOHOR**. Bagi memastikan kecukupan air mentah untuk memenuhi keperluan bekalan air bersih rakyat di Negeri Johor, Kerajaan Negeri bersama Kerajaan Persekutuan akan melaksanakan projek seperti berikut:

- Pertama : **RM 12.8 juta** bagi menaik taraf 6 empangan di Negeri Johor iaitu Empangan Juaseh, Empangan Gunung Pulai 2, Empangan Gunung Pulai 3, Empangan Pontian Kecil, Empangan Lebam dan Empangan Gunung Ledang;
- Kedua : **RM 4 juta** bagi kerja-kerja menyelenggara dan menaik taraf aset-aset air mentah.

INISIATIF 2: MENINGKATKAN KECEKAPAN RAWATAN DAN AGIHAN AIR

159. Inisiatif kedua ialah **MENINGKATKAN KECEKAPAN RAWATAN DAN AGIHAN AIR**. Antara projek yang akan dilaksanakan oleh RSAJ ialah:

- Pertama : **RM 18.6 juta** bagi menaik taraf **Agihan Air Parit Sulong, Batu Pahat** yang akan memanfaatkan **18 ribu pengguna domestik**;
- Kedua : **RM 143.6 juta** bagi **Pengoperasian Loji Rawatan Air (LRA) Kahang Baharu** untuk meningkatkan margin simpanan air daripada 9 peratus kepada 25 peratus yang akan memanfaatkan **162 ribu pengguna**;
- Ketiga : **RM 165 juta** bagi meneruskan **Projek Penggantian Paip Lama** di Negeri Johor yang melibatkan penggantian sepanjang 206 km yang akan memanfaatkan **170 ribu pengguna** domestik dan industri.

INISIATIF 3: MEMPERLUAS BEKALAN ELEKTRIK

160. Inisiatif ketiga ialah **MEMPERLUAS BEKALAN ELEKTRIK**. Bagi menyokong pembangunan pesat di Negeri Johor, Tenaga Nasional Berhad (TNB) akan melaksanakan projek sebagaimana berikut:

- Pertama : **RM 127.97 juta** untuk **membangunkan 3 Pencawang Pembahagian Utama (PPU)** di Kawasan Perindustrian Senai, Kulai, Yong Peng dan Tangkak yang melibatkan **13,180 pengguna**;
- Kedua : **RM 30.25 juta** untuk menaik taraf **13 Sistem Voltan Tinggi 33KV** di daerah Johor Bahru di kawasan Taman Perling, Iskandar Puteri, Tanjung Pelepas, Gelang Patah, Medini dan Pasir Gudang yang melibatkan **33,641 pengguna**.

STRATEGI 4: MEMBINA DAN MENAIK TARAF PUSAT KOMUNITI DAN PERNIAGAAN

Yang Berhormat Datuk Speaker,

161. Strategi keempat di bawah teras ini adalah **MEMBINA DAN MENAIK TARAF PUSAT KOMUNITI DAN PERNIAGAAN**.

INISIATIF 1: MEMBINA KEMUDAHAN AWAM UNTUK KOMUNITI

162. Inisiatif pertama di bawah strategi ini ialah **MEMBINA KEMUDAHAN AWAM KOMUNITI**. Bagi memenuhi keperluan kemudahan awam untuk aktiviti sosial dan komuniti, PBT akan membina dan menyiapkan beberapa projek antaranya seperti:

- Pertama : **RM 1.1 juta** bagi **Dewan Orang Ramai di Taman Tan Sri Yaacob**;
- Kedua : **RM 500 ribu** bagi **Dewan Terbuka Gunung Pulai**;
- Ketiga : **RM 1 juta** bagi **Hab Komuniti dan Mini Perpustakaan Digital di Taman Impian Emas dan Taman Bukit Indah**.

INISIATIF 2: MEMBINA DAN MENAIK TARAF KEMUDAHAN TAPAK PERNIAGAAN

163. Inisiatif kedua pula ialah **MEMBINA DAN MENAIK TARAF KEMUDAHAN TAPAK PERNIAGAAN**. Kerajaan Negeri dan PBT akan menaik taraf kemudahan tapak perniagaan antaranya seperti berikut:

- Pertama : **RM 1 juta** bagi menaik taraf **Kawasan Rehat dan Rawat (R&R) Simpang Tenggaroh, Mersing**;
- Kedua : **RM 1.9 juta** bagi membina dan menyiapkan kemudahan perniagaan di **Medan Selera Taman Perling dan Pusat Perniagaan Taman Teratai**;
- Ketiga : **RM 2.4 juta** bagi menaik taraf gerai dan tapak penjaja di **Pasir Gudang**;

Keempat : **RM 1.5 juta** bagi membangunkan semula Medan Selera Teluk Sengat.

STRATEGI 5: MEMPERKASA INFRASTRUKTUR PENDIDIKAN DAN PENGURUSAN AGAMA ISLAM

Yang Berhormat Datuk Speaker,

164. Strategi kelima di bawah teras ini ialah **MEMPERKASA INFRASTRUKTUR PENDIDIKAN DAN PENGURUSAN AGAMA ISLAM.**

INISIATIF 1 : PENYELENGGARAAN SEKOLAH AGAMA, MASJID DAN TANAH PERKUBURAN

165. Melalui inisiatif **PENYELENGGARAAN SEKOLAH AGAMA, MASJID DAN TANAH PERKUBURAN**, projek-projek berikut akan dilaksanakan:

Pertama : **RM 12.5 juta** bagi menyelenggara dan membaik pulih **88 buah Sekolah Agama Kerajaan Johor (SAKJ)**;

Kedua : **RM 1 juta** bagi membaik pulih masjid-masjid;

Ketiga : **RM 3.8 juta** bagi menaik taraf infrastruktur Tanah Perkuburan Islam Bandar Putra Kulai dan Tanah Perkuburan Islam Mut'mainnah Pasir Gudang.

TERAS KELIMA: KESELAMATAN, KEBERSIHAN DAN KELESTARIAN ALAM SEKITAR

Yang Berhormat Datuk Speaker,

166. Teras kelima pula adalah **Keselamatan, Kebersihan dan Kelestarian Alam Sekitar.**

Tanjung Balau indah berseri
Flora menghijau segar teramat
Bersatu hati memakmur negeri
Johor maju, bersih dan selamat

167. Bagi menzahirkan agenda kelestarian dan kemampanan alam sekitar, Kerajaan Negeri telah menubuhkan **Majlis Pembangunan Hijau** yang berperanan untuk menyelaras, memantau dan memastikan Kerangka Pembangunan Hijau dapat dilaksanakan secara holistik bagi mencapai visi persekitaran yang Rendah Karbon, Mampan dan Berdaya Huni dapat direalisasikan dengan lebih berkesan.
168. Kerajaan Negeri ingin merakamkan ucapan terima kasih di atas **10 syor** yang telah dibentangkan oleh **JAWATANKUASA PILIHAN PERUBAHAN IKLIM DAN PENGURUSAN BENCANA NEGERI JOHOR** kepada dewan yang mulia ini. Syukur Alhamdulillah, sebahagian besar syor tersebut telahpun diambil tindakan.
169. Di bawah teras ini, terdapat **4 strategi** dan **11 inisiatif** yang dirangka untuk memastikan keselamatan, kebersihan dan alam sekitar di negeri ini sentiasa menjadi keutamaan.

STRATEGI 1: JOHOR LESTARI

Yang Berhormat Datuk Speaker,

170. Strategi pertama di bawah teras kelima ialah **JOHOR LESTARI**.

INISIATIF 1: PENUBUHAN JOHOR SUSTAINABILITY CENTRE (JSC)

171. Inisiatif pertama dalam strategi ini ialah **PENUBUHAN JOHOR SUSTAINABILITY CENTRE** atau **JSC**. Patik menjunjung setinggi-tinggi kasih atas perkenan Duli Yang Maha Mulia Raja Zarith Sofiah binti Almarhum Sultan Idris Shah, Permaisuri Johor mencemar duli merasmikan penubuhan JSC bersempena *Asia Pacific Climate Week* baru-baru ini.
172. Tahniah juga diucapkan kepada Yang Berhormat Benut di atas lantikan sebagai Pengerusi JSC yang pertama. Penubuhan JSC akan menjadi pemudah cara bagi Kerajaan Negeri mengorak langkah lebih jauh di dalam agenda pembangunan hijau. **RM 500 ribu** diperuntukan sebagai dana awalan bagi pengoperasian JSC.

INISIATIF 2 : PROGRAM RINTIS KENDERAAN ELEKTRIK

173. Inisiatif kedua pula ialah **PROGRAM RINTIS KENDERAAN ELEKTRIK**. **RM 2.5 juta** diperuntukkan bagi program rintis penggunaan kenderaan elektrik sebagai kenderaan jabatan yang merupakan antara inisiatif awal yang terdapat di dalam *Johor Green Deal*.

INISIATIF 3: PEMELIHARAAN DAN PEMULIHARAAN KAWASAN HIJAU

174. Inisiatif ketiga adalah **PEMELIHARAAN DAN PEMULIHARAAN KAWASAN HIJAU**. Menerusi inisiatif ini, beberapa langkah proaktif bagi menjayakan program penghijauan bumi akan dilaksanakan sepertimana berikut:

Pertama : **RM 4 juta** oleh PBT di dalam **Greater Johor Bahru** untuk program penghijauan melalui penanaman pokok bagi menyederhanakan suhu dalam bandar;

Kedua : **RM 670 ribu** untuk program pemeliharaan kawasan **Hutan Simpan Kekal** atau **HSK** yang akan meningkatkan peratusan **HSK** di **Negeri Johor** daripada **18 peratus** kepada **30 peratus** menjelang 2030;

Ketiga : **RM 560 ribu** bagi **Program Restorasi Kawasan Terosot**, menaik taraf infrastruktur dan **Program Communication, Educational and Public Awareness (CEPA)** berkaitan pengurusan dan konservasi hutan.

INISIATIF 4: MENAIK TARAF KAWASAN PERLINDUNGAN PANTI

175. Inisiatif seterusnya ialah **MENAIK TARAF KAWASAN PERLINDUNGAN PANTI**. Kerajaan Negeri berterima kasih atas keprihatinan Kerajaan Persekutuan memperuntukkan **RM 400 ribu** bagi kerja-kerja tanah untuk tujuan pembinaan **Kompleks Pengurusan Panti Conservation Area**. Oleh yang demikian, Kerajaan Negeri juga akan memperuntukkan **RM 420 ribu** bagi kerja menaik taraf Kompleks Suaka Burung Panti.

Untuk makluman, terdapat 300 spesis burung di suaka ini termasuk 9 spesis jarang ditemui, antaranya **Malaysian Rail-babbler**.

STRATEGI 2: JOHOR SMART CITY

Yang Berhormat Datuk Speaker,

176. Strategi kedua di bawah teras ini ialah **JOHOR SMART CITY**. Kerajaan Negeri telah melancarkan Pelan Tindakan Bandar Pintar Negeri Johor 2030 bagi memastikan Johor menjadi sebuah negeri berdaya huni. Oleh yang demikian, berikut ialah inisiatif - inisiatif yang akan dilaksanakan.

INISIATIF 1 : PELAKSANAAN PELAN TINDAKAN BANDAR PINTAR NEGERI JOHOR 2030

177. Inisiatif pertama dalam strategi ini ialah **PELAKSANAAN PELAN TINDAKAN BANDAR PINTAR NEGERI JOHOR 2030**. Kerajaan Negeri bersama-sama PBT akan bekerjasama dalam melaksanakan projek-projek berikut:

- Pertama : **RM 15 juta** untuk membina Pusat Kawalan dan Arahan (**Command Control Centre**) di Menara MBBJ dan MBIP;
- Kedua : **RM 4.4 juta** bagi memasang **Sistem CCTV** di kawasan strategik di kawasan PBT;
- Ketiga : **RM 850 ribu** bagi **Johor Urban Observatory (JUO)**;
- Keempat : **RM 2.49 juta** bagi **Projek Smart Deep Collection System** di Hutan Bandar Mutiara Rini, Taman Rekreasi Sireh Park, Kompleks Pusat Bandar Pasir Gudang dan beberapa lokasi lain;
- Kelima : **RM 150 ribu** bagi penganjuran **Johor Smart City Day (JSCD)**.

INISIATIF 2 : PENUBUHAN UNIT BANTUAN KECEMASAN DAN BENCANA

178. Inisiatif kedua ialah **PENUBUHAN UNIT BANTUAN KECEMASAN DAN BENCANA**. Kerajaan Negeri mengalu-alukan penubuhan **Team Skuad Kilat** dan ***First Arrival Support Team (FAST)*** oleh MBBJ dan MBIP yang berperanan sebagai unit terawal bagi memberikan bantuan semasa bencana mahupun apa-apa juga situasi kecemasan. Sebanyak **RM 4.15 juta** diperuntukkan bagi pembelian aset-aset dan pelaksanaan program CSR.

STRATEGI 3 : JOHOR BERSIH

Yang Berhormat Datuk Speaker,

179. Strategi ketiga di bawah teras ini ialah **JOHOR BERSIH**.

INISIATIF 1: MEMASTIKAN KEBERSIHAN PERSEKITARAN

180. Inisiatif pertama dalam strategi ini ialah **MEMASTIKAN KEBERSIHAN PERSEKITARAN**. Untuk tujuan tersebut, usaha-usaha berikut akan dilaksanakan:

- Pertama : **RM 300 ribu** bagi **Penubuhan Skuad *Anti Litter*** bagi pelaksanaan penguatkuasaan terhadap pesalah yang membuang sampah di tempat awam;
- Kedua : **RM250 ribu** bagi pelaksanaan **Sistem e-Merit** bagi memastikan penguatkuasaan kebersihan di dalam dan luar premis;
- Ketiga : **RM 565 ribu** bagi **pemantauan kualiti dan kebersihan air sungai** di kawasan Pasir Gudang.
- Keempat : Mengenal pasti bilangan ***Real Time Pollution Sensor*** yang diperlukan bagi memastikan mitigasi segera dapat diambil terhadap sebarang elemen pencemaran.

INISIATIF 2 : SUNGAI BERSIH

181. Inisiatif kedua ialah **SUNGAI BERSIH**. Sehingga September 2023, sebanyak 207 tan sampah telah dikutip di sepanjang Sungai Skudai dan 97 tan di Sungai Tebrau. Jabatan Pengairan dan Saliran bersama PBT dan agensi-agensi angkat yang diamanahkan untuk menjaga kebersihan sungai-sungai utama dalam bandaraya ini akan terus menyokong program Johor Bersih secara berterusan. Justeru, **RM 2.4 juta** diperuntukkan bagi meneruskan **Program Sungai Bersih**.

INISIATIF 3: PELAKSANAAN PELAN TINDAKAN TERHADAP CADANGAN RANCANGAN KAWASAN KHAS (RKK) SUNGAI SKUDAI

182. Inisiatif ketiga ialah **PELAKSANAAN PELAN TINDAKAN TERHADAP CADANGAN DALAM RANCANGAN KAWASAN KHAS (RKK) SUNGAI SKUDAI**. RKK ini melibatkan tiga PBT iaitu MBBB, MBIP dan MPKu. Pemeliharaan dan pemuliharaan kawasan Sungai Skudai akan dilaksanakan sebagaimana berikut:

- Pertama : **RM 4 juta** bagi membina dan menaik taraf perangkap sampah;
- Kedua : **RM 2 juta** bagi **Pembangunan *Great Trail* Sungai Skudai** untuk mewujudkan trek basikal dan pejalan kaki;
- Ketiga : **RM 2.3 juta** untuk aktiviti pelupusan sisa pepejal luar kawasan bercukai, aktiviti penguatkuasaan dan pemantauan berkala bagi mengawal aktiviti pencerobohan rizab sungai dan pembuangan sampah secara haram.

STRATEGI 4: MENAMBAH BAIK SISTEM SALIRAN DAN PENGURUSAN BANJIR DI JOHOR

Yang Berhormat Datuk Speaker,

183. Strategi keempat di bawah teras ini ialah **MENAMBAH BAIK SISTEM SALIRAN DAN PENGURUSAN BANJIR DI JOHOR**.

INISIATIF 1: MENAIK TARAF SISTEM SALIRAN

184. Inisiatif pertama di bawah strategi ini ialah **MENAIK TARAF SISTEM SALIRAN**. Penaiktarafan saliran akan dilaksanakan secara berfasa melalui:

- Pertama : **RM 18.9 juta** bagi menambah baik **Sistem Saliran dan Pengurusan Banjir** dalam kerja-kerja berkaitan pengairan, pengawalan hakisan dan pencegahan banjir;
- Kedua : **RM 3.4 juta** bagi **Projek Menaik Taraf Parit Utama di Taman Damai Jaya, Skudai**.

INISIATIF 2: MEMPERKASA PENGURUSAN BANJIR

185. Inisiatif kedua ialah **MEMPERKASA PENGURUSAN BANJIR**. Pengurusan banjir yang terancang dan sistematik dapat mengurangkan impak akibat banjir yang melibatkan kehilangan nyawa dan harta benda.

186. Kerajaan Negeri turut menzahirkan ucapan terima kasih kepada Kerajaan Persekutuan melalui Kementerian Sumber Asli, Alam Sekitar dan Perubahan Iklim, yang komited untuk mengatasi masalah banjir dan hakisan melalui projek seperti berikut:

- Pertama : **RM 762 juta** bagi **Rancangan Tebatan Banjir Lembangan Sungai Johor Fasa 1**, di Daerah **Kota Tinggi**;
- Kedua : **RM 648 juta** bagi **Rancangan Tebatan Banjir Lembangan Sungai Muar Fasa 3**, di Daerah **Segamat**;
- Ketiga : **RM 195 juta** bagi **Rancangan Tebatan Banjir Bandar Batu Pahat**;
- Keempat : **RM 29 juta** bagi **Projek Pengawalan Hakisan di Pulau-Pulau di Daerah Mersing**.

187. Selain itu, Kerajaan Negeri juga akan melaksanakan projek-projek berikut untuk mengatasi masalah banjir:

- Pertama : **RM 500** ribu bagi penyelenggaraan di **Sungai Taman Johor dan Sungai Taman Anggerik**;
- Kedua : **RM 8.3** juta bagi pemuliharaan lembangan sungai dan meningkatkan kesiapsiagaan menghadapi banjir;
- Ketiga : **RM 2.3** juta bagi membina dan menyiapkan **Tembok Hakisan Tebing di Sungai Melana**;
- Keempat : **RM 4.5** juta bagi membina dan menaik taraf **parit di kawasan Pasir Gudang**;
- Kelima : Kajian untuk mengaplikasi **Konsep "Sponge City"** dalam pengurusan air perbandaran. *Sponge City* merupakan konsep penyimpanan dan penggunaan air hujan berskala besar.

TERAS KEENAM: ORANG MUDA JOHOR

Yang Berhormat Datuk Speaker,

188. Teras Keenam Agenda Maju Johor ialah **ORANG MUDA JOHOR**.

Ke Tanjung Puteri berdayung rakit
Membawa dagang si ikan tenggiri
Orang Muda teruslah bangkit
Padamu terletak harapan negeri

189. Menjunjung kasih Duli Yang Amat Mulia Tunku Mahkota Johor yang sentiasa menjadi inspirasi kepada anak-anak muda di Johor untuk melangkah lebih jauh dan maju ke hadapan.

190. Orang Muda Johor perlu berupaya meletakkan diri mereka setanding di peringkat nasional dan global. Dengan itu, **6 strategi** dan **10 inisiatif** akan dilaksanakan di bawah teras ini.

STRATEGI 1: KEPIMPINAN ORANG MUDA JOHOR

Yang Berhormat Datuk Speaker,

191. Strategi pertama di bawah teras keenam ialah **KEPIMPINAN ORANG MUDA JOHOR**.

INISIATIF 1: PROGRAM KEMAHIRAN KEPIMPINAN

192. Inisiatif pertama dalam strategi ini adalah **PROGRAM KEMAHIRAN KEPIMPINAN**. Kerajaan Negeri melalui **Institut Dato' Onn (IDO)** akan melaksanakan inisiatif berikut:

- Pertama : **RM 500 ribu** bagi **IDO Research Centre** yang akan memanfaatkan kuasa analisis data menggunakan kepintaran pembuatan (AI) untuk menjana perubahan serta menyediakan cerapan dan analisis berasaskan data;
- Kedua : **RM 400 ribu** bagi Program **Johor Global Leadership Nexus**. Program ini meliputi lawatan lapangan dan jalinan kerjasama di luar negara lanjutan daripada Persidangan Belia Antarabangsa Johor (JIYC) 2023;
- Ketiga : **RM100 ribu** bagi **Program Johor Outbound School** yang direka khas bagi pelajar cemerlang semasa cuti sekolah melalui pembelajaran teknologi AI;
- Keempat : **RM 200 ribu** bagi **Program University Leadership Engagement** melibatkan mahasiswa di 20 buah institusi IPTA dan IPTS seluruh negara;
- Kelima : **RM 600 ribu** bagi **Program Johor Apprentice 2024** untuk membentuk pemimpin masa depan dan mengenal pasti bakat luar biasa dalam kalangan graduan melalui latihan dalam tempoh tiga hingga enam bulan;

- Keenam **RM 1.3 juta** bagi Program **Onn Leadership Accelerator (OLA)** yang merupakan program kesinambungan tahun 2023;
- Ketujuh **RM 300 ribu** bagi Program **Innovation Culture Among Youth** untuk menyemarakkan budaya inovasi dan penyelesaian inovatif kepada cabaran tempatan;
- Kelapan **RM 250 ribu** bagi Program **Skill Enhancement** untuk memupuk inovasi dalam bidang kepimpinan, pengurusan projek, teknologi dan keusahawanan sosial;
- Kesembilan **RM 200 ribu** bagi **Dewan Muda Johor** sebagai medium demokratik yang bersifat tersusun dalam menyalurkan kritikan, saranan serta ikhtiar semak dan imbang dalam pentadbiran Kerajaan Negeri Johor.

STRATEGI 2: ASPIRASI ORANG MUDA JOHOR (OMJ)

Yang Berhormat Datuk Speaker,

193. Strategi kedua dalam Teras Orang Muda Johor ialah **ASPIRASI ORANG MUDA JOHOR (OMJ)**.

INISIATIF 1: PROGRAM PENINGKATAN *SOFT SKILL* DAN JATI DIRI OMJ

194. Inisiatif pertama dalam strategi ini ialah **PROGRAM PENINGKATAN *SOFT SKILL* DAN JATI DIRI OMJ**. Antara program yang akan dilaksanakan adalah seperti berikut:

- Pertama : **RM 250 ribu** bagi **Program Peningkatan *Soft Skill* Belia Negeri Johor** yang bertujuan untuk melahirkan kepimpinan belia yang mempunyai kemahiran pengucapan awam yang baik, pengetahuan berkenaan sejarah Negeri

Johor dan pengalaman menguruskan program bertaraf antarabangsa;

- Kedua : **RM 1.5 juta** bagi **Program Jelajah Aspirasi Orang Muda Johor** yang akan diadakan di seluruh daerah bagi menyantuni Orang Muda Johor. Program ini akan meliputi Program Jelajah Usahawan, Program Gerak Kerjaya, dan Sambutan Hari Belia Negara;
- Ketiga : **RM 200 ribu** bagi **Dana Bantuan Pengurusan dan Pentadbiran Majlis Belia Negeri Johor**;
- Keempat : **RM 365 ribu** bagi **Geran Pentadbiran dan Pengurusan** kepada **73 Majlis Belia Felda Malaysia Negeri Johor**;
- Kelima : **RM 50 ribu** bagi pelaksanaan **Kursus Pengurusan Organisasi Majlis Belia Negeri Johor**;
- Keenam : **RM 500 ribu** bagi **Memperkukuh Usahawan Belia**.

INISIATIF 2: SUKARELAWAN OMJ

195. Inisiatif kedua ialah **SUKARELAWAN OMJ**. Agenda sukarelawan akan diperkasakan melalui inisiatif dengan melaksanakan program berikut:

- Pertama : **RM 200 ribu** bagi **Penubuhan Skwad Muda Southern Volunteers IPTA/IPTS**;
- Kedua : **RM 200 ribu** bagi melaksanakan **Program Kesedaran dan Latihan Persediaan Menghadapi Bencana**;
- Ketiga : **RM 50 ribu** bagi **Program Perkongsian Kepakaran dan Kemahiran Belia Negeri Johor Bersama NGO Berteraskan Kegiatan Sukarelawan** di Negeri Johor;

- Keempat : **RM 200 ribu** bagi penganjuran **Sambutan Hari Sukarelawan Peringkat Negeri Johor**;
- Kelima : **RM 100 ribu** bagi membangunkan laman sesawang **Southern Volunteers**.

STRATEGI 3: PENDIDIKAN ORANG MUDA JOHOR

196. Strategi ketiga di bawah teras ini ialah **PENDIDIKAN ORANG MUDA JOHOR**. Generasi muda perlu dilengkapi dengan ilmu pengetahuan dan kemahiran serta diperkukuh dengan akhlak terpuji dan nilai murni dalam membina Bangsa Johor Bestari. Menerusi teras ini, Kerajaan Negeri bertekad untuk melaksanakan inisiatif berikut.

INISIATIF 1: BIASISWA DAN INSENTIF PENDIDIKAN

197. Inisiatif pertama dalam strategi ini ialah **BIASISWA DAN INSENTIF PENDIDIKAN**. Kerajaan Negeri akan melaksanakan program galakan seperti berikut:

- Pertama : **RM 2 juta** bagi **Biasiswa Orang Muda Johor** kepada **pelajar-pelajar cemerlang SPM** bagi membolehkan mereka melanjutkan pengajian di universiti terkemuka di luar negara;
- Kedua : **RM 650 ribu** bagi **Biasiswa Kenangan Dato' Onn** kepada **1 ribu orang pelajar B40 Sekolah Menengah**;
- Ketiga : **RM 150 ribu** bagi **Biasiswa** di bawah **Tabung Pendidikan Sarjana PDT** kepada **pelajar pasca siswazah**;
- Keempat : **RM 3.7 juta** bagi **Insentif Mahasiswa Anak Johor** yang akan memberi manfaat kepada **75 ribu mahasiswa anak Johor**;
- Kelima : **RM 100 ribu** bagi **Insentif Pelajar Cemerlang SPM** kepada **50 orang pelajar cemerlang SPM** oleh Yayasan Raja Zarith Sofiah di seluruh Johor.

198. Untuk makluman Ahli-Ahli yang berhormat, penderma-penderma yang memberi sumbangan dan derma kepada **Tabung Kebajikan & Pelajaran Yayasan Pelajaran Johor** di bawah **subseksyen 44(6) Akta Cukai Pendapatan 1967** ini layak mendapat **tolakan cukai terhadap kepada 10 peratus** daripada pendapatan agregat bagi individu dan Syarikat.
199. Justeru itu, Kerajaan Negeri Johor ingin menyeru kepada semua jabatan, GLC dan badan-badan berkanun untuk menyumbang kepada tabung ini demi pembangunan dan pemeraksanaan pendidikan Bangsa Johor.

INISIATIF 2: BANTUAN AKSES PENDIDIKAN ASNAF

Yang Berhormat Datuk Speaker,

200. Inisiatif kedua pula adalah **BANTUAN AKSES PENDIDIKAN ASNAF**. Bagi inisiatif ini, sejumlah **RM 19 juta** diperuntukkan oleh MAINJ sebagaimana berikut:

- Pertama : **RM 6.4 juta** bagi **Program Bantuan Awal Persekolahan** kepada keluarga kurang berkemampuan dengan menyediakan keperluan persekolahan seperti yuran dan pakaian sekolah yang akan memanfaatkan **52 ribu orang penerima**;
- Kedua : **RM 1 juta** bagi **Bantuan Pendidikan Dalam Bentuk Tambang** untuk **300 pelajar** yang mendaftar di IPT luar negara;
- Ketiga : **RM 3.4 juta** bagi **Pendaftaran IPT** kepada anak-anak daripada keluarga kurang berkemampuan;
- Keempat : **RM 4.6 juta** bagi **Program Dermasiswa** kepada **520 pelajar**;

- Kelima : **RM 3 juta** bagi **Pinjaman Pelajaran** kepada **100 pelajar** dengan pinjaman maksimum **RM 30 ribu** seorang;
- Keenam : **RM 400 ribu** bagi **Kemudahan Fasilitas** untuk tujuan pengajaran dan pembelajaran;
- Ketujuh : **RM 200 ribu** bagi pembelian **10 mesin Braille** kepada pelajar di **Sekolah Rendah Princess Elizabeth** dan **Maktab Sultan Abu Bakar, Johor Bahru**.

INISIATIF 3 : GALAKAN KECEMERLANGAN AKADEMIK

201. Inisiatif ketiga pula iaitu **GALAKAN KECEMERLANGAN AKADEMIK**. Kerajaan Negeri akan turut memastikan anak muda Johor terus cemerlang dari sudut akademik, pembentukan peribadi unggul dan berketerampilan, melalui program-program berikut yang akan dilaksanakan:

- Pertama : **RM 200 ribu** bagi Program **Johor Stars Go Global** Yayasan Raja Zarith Sofiah sebagai insentif galakan kepada pelajar-pelajar Negeri Johor untuk mewakili negeri dan negara dalam pelbagai acara dan pertandingan di peringkat antarabangsa;
- Kedua : **RM 200 ribu** untuk Program **English Bootcamp** yang merupakan kerjasama antara Yayasan Raja Zarith Sofiah dan Jabatan Pendidikan Negeri Johor yang melibatkan penyertaan seramai **500 orang murid**;
- Ketiga : **RM 700 ribu** bagi Program **Tuisyen SPM** melalui **Yayasan Pelajaran Johor** dan **Yayasan JCORP**;
- Keempat : **RM 400 ribu** bagi Program **Akademi Debat Johor** bagi melahirkan pendebat-pendebat yang versatil;

- Kelima : **RM 750 ribu** bagi Program **Kelas Bestari Bangsa Johor 2.0** untuk **30 buah** sekolah luar bandar;
- Keenam : Memastikan semua perpustakaan awam di bawah pengurusan **Perbadanan Perpustakaan Awam Negeri Johor** dibuka selama **7 hari seminggu**. Inisiatif ini akan dimulakan di **Perbadanan Perpustakaan Awam Jalan Yahya Awal** bermula **1 Disember 2023**.

INISIATIF 4: PROGRAM GALAKAN MELANJUTKAN PELAJARAN KE IPT

Yang Berhormat Datuk Speaker,

202. Seterusnya, inisiatif keempat iaitu **PROGRAM GALAKAN MELANJUTKAN PELAJARAN KE IPT**. Kerajaan Negeri turut akan menyediakan bantuan dan insentif sebagaimana berikut:

- Pertama : **RM 11.1 juta** bagi **Skim Bantuan Pendaftaran oleh Yayasan Pelajaran Johor** kepada **22,200 pelajar baru** yang akan melanjutkan pelajaran ke Institut Pengajian Tinggi;
- Kedua : **RM 15 juta** bagi **Skim Pinjaman Pelajaran** kepada **1,100 mahasiswa** yang melanjutkan pengajian di peringkat Diploma dan Ijazah Sarjana Muda;
- Ketiga : **RM 600 ribu** bagi **Insentif Kepada Persatuan Mahasiswa IPT Anak Johor** yang memanfaatkan **25 buah** Persatuan Mahasiswa Anak Johor di IPT seluruh Malaysia. Di samping itu, Kerajaan Negeri akan turut memperkenalkan program **Persatuan Mahasiswa Angkat bersama Yang Berhormat ADUN**;
- Keempat : **RM 200 ribu** bagi **Program Duta Mahasiswa Anak Johor** akan diteruskan bagi melaksanakan projek keusahawanan sosial yang berimpak tinggi;

Kelima : **RM 166 ribu** bagi pemasangan **internet berkelajuan tinggi** dengan **1Gbps** di **Kolej Universiti Islam Johor Sultan Ibrahim** dan **Kolej Yayasan Pelajaran Johor**.

STRATEGI 4: JB SPORTS CITY

Yang Berhormat Datuk Speaker,

203. Strategi keempat di bawah teras keenam ialah **JB SPORTS CITY**. Kerajaan Negeri berhasrat untuk menjadikan daerah Johor Bahru sebagai hab sukan yang akan membolehkan Johor dikenali sebagai 'Sports Powerhouse' selaras dengan Johor *Sports Master Plan 2030*.

204. Pada masa ini, Johor Bahru mempunyai pelbagai fasiliti sukan bertaraf antarabangsa untuk sukan bola sepak, basikal dan banyak lagi. Fasiliti-fasiliti sukan ini akan membantu untuk memacu industri sukan bukan sahaja untuk atlet, malah untuk orang awam dan pelancong.

INISIATIF 1: PENGANJURAN SUKAN BERTARAF ANTARABANGSA

205. Inisiatif di bawah strategi ini ialah **PENGANJURAN SUKAN BERTARAF ANTARABANGSA**. Kerajaan Negeri dengan kerjasama KPRJ Sports akan melaksanakan penganjuran sukan bertaraf kebangsaan dan antarabangsa sepanjang tahun 2024 dengan mengoptimumkan penggunaan fasiliti-fasiliti sukan tersebut.

206. Antara acara yang telah dikenal pasti adalah penganjuran **Johor-Maybank Cycling Event** dengan usahasama **pihak Maybank Berhad**, yang akan diadakan di sekitar Johor Bahru melibatkan penyertaan dari dalam dan luar negara.

207. Seterusnya, Kerajaan Negeri juga berhasrat untuk bekerjasama dengan Singapura bagi menganjurkan **Johor-Singapore International Run** pada tahun 2024.

STRATEGI 5: XTIF JOHOR

Yang Berhormat Datuk Speaker,

208. Strategi kelima di bawah teras ini ialah **XTIF JOHOR**. Bagi mengekalkan gaya hidup sihat dan pembudayaan sukan, penekanan turut diberi dalam acara sukan yang melibatkan masyarakat di pelbagai peringkat.

INISIATIF 1 : SUKAN @ XTIF JOHOR

209. Inisiatif **SUKAN @ XTIF JOHOR** menggariskan acara sukan yang melibatkan pelbagai segmen sukan dan kelompok masyarakat seperti berikut :

- Pertama : **RM 1.1 juta** bagi penganjuran **Sukan Bangsa Johor** yang melibatkan penyertaan daripada **56 DUN**.
- Kedua : **RM 1.2 juta** bagi inisiatif **Johor Athlete Career & Education (JACE)** dengan sasaran melahirkan lebih ramai '*Thinking Athletes*' serta peluang melanjutkan pelajaran secara sepenuh masa dan separuh masa di UTM dan UiTM;
- Ketiga : **RM 300 ribu** bagi **Insentif dan Bantuan Para SUKMA 2024**.
- Keempat : **RM 200 ribu** bagi **Pembangunan Sukan e-Sport**.
- Kelima : **RM 200 ribu** bagi **Sukan Penjawat Awam Negeri Johor 2024**.

STRATEGI 6: MEMBINA DAN MENAIK TARAF PUSAT REKREASI DAN SUKAN

Yang Berhormat Datuk Speaker,

210. Strategi keenam di bawah teras Orang Muda Johor ialah **MEMBINA DAN MENAIK TARAF PUSAT REKREASI DAN SUKAN**.

INISIATIF 1 : PEMBANGUNAN DAN MENAIK TARAF INFRASTRUKTUR SUKAN

211. Melalui inisiatif **PEMBANGUNAN DAN MENAIK TARAF INFRASTRUKTUR SUKAN**. Sejumlah **RM 8.8 juta** diperuntukkan bagi memastikan kemudahan sukan, pusat rekreasi dan permainan dalam keadaan yang baik demi kesejahteraan masyarakat setempat sepertimana berikut:

- Pertama : **RM 3 juta** bagi membangunkan **5 gelanggang futsal** dengan **spesifikasi FIFA** di Iskandar Puteri;
- Kedua : **RM 4.5 juta** bagi **Menaik Taraf Dataran dan Padang Dataran Iskandar Puteri**;
- Ketiga : **RM 800 ribu** bagi **Pembinaan Fasa 1 Mini Stadium Bandar Tangkak**;
- Keempat : **RM 500 ribu** bagi **Membina Laman 'Kulai Cycling Park'**.

RUMUSAN ENAM TERAS BELANJAWAN 2024

Yang Berhormat Datuk Speaker,

212. Saya telah membentangkan **Enam Teras, 29 Strategi dan 99 inisiatif** dalam belanjawan kali ini. Semua strategi dan inisiatif ini telah disusun rapi dengan mengambil kira keutamaan, keperluan, dan kemaslahatan seluruh Bangsa Johor.

213. Saya juga ingin menjelaskan bahawa pembentangan Belanjawan Johor 2024 ini merupakan suatu kesinambungan daripada Belanjawan Tahun 2023. Menerusi belanjawan ini, saya dan barisan kepimpinan akan berusaha dengan sedaya upaya, dengan penuh tekad dan komitmen, bagi memastikan Agenda Maju Johor dijayakan dengan sebaik-baiknya demi rakyat dan negeri tercinta ini.

PENUTUP

Yang Berhormat Datuk Speaker,

214. Sekianlah pembentangan saya bagi Belanjawan Johor 2024 yang bertemakan “**Memacu Pembangunan, Menyejahterakan Rakyat**”.
215. Saya sedar dan insaf bahawa banyak lagi inisiatif, yang perlu kita laksanakan. Namun saya berharap belanjawan ini akan dapat memberi manfaat kepada 4 juta Bangsa Johor.
216. Ucapan terima kasih dan penghargaan juga saya rakamkan buat kesemua Pengerusi Jawatankuasa yang telah memberi cadangan pelaksanaan program dan projek serta peruntukan kewangan bagi menjayakan inisiatif Agenda Maju Johor.
217. Tidak lupa ucapan setinggi-tinggi terima kasih dan penghargaan saya kepada Setiausaha Kerajaan Johor, Yang Berhormat Tan Sri Dato’ Dr. Haji Azmi Rohani, seluruh pegawai kanan Kerajaan Negeri dan Persekutuan, pihak berkuasa tempatan, pegawai-pegawai daerah serta pemimpin GLC Negeri Johor.
218. Kepada semua Ahli-ahli Yang Berhormat Dewan Undangan Negeri dari pihak kerajaan dan pengimbang, marilah kita sama-sama berganding bahu dan bersatu tenaga menjayakan pelbagai projek dan program sepertimana yang dibentangkan dalam Belanjawan Negeri Johor 2024 sebentar tadi.
219. Saya juga berharap agar kesemua Ahli-ahli Yang Berhormat Dewan Undangan Negeri dapat memantau segala rancangan yang telah disusun agar Agenda Maju Johor dapat dijayakan dengan sebaiknya melalui pelbagai inisiatif di kawasan masing-masing.

MENGHARGAI PENJAWAT AWAM JOHOR

Yang Berhormat Datuk Speaker,

220. Seperti yang disebut pada awal ucapan saya tadi, prestasi hasil Kerajaan Negeri, Alhamdulillah telah mencapai sasaran. Justeru, selain daripada membantu rakyat di luar sana, sebagai tanda penghargaan penjawat-penjawat awam Negeri Johor, kita mengambil pendekatan untuk memberikan insentif berdasarkan pencapaian sebenar.
221. Sehubungan dengan itu, sebagai tanda penghargaan dan terima kasih, saya dengan sukacitanya ingin mengumumkan

pemberian Bantuan Khas Kewangan Tahun 2023 sebanyak **2 bulan gaji kepada kakitangan Kerajaan Negeri Johor** dan kakitangan awam persekutuan yang dibayar gaji oleh kerajaan Negeri Johor.

222. Semoga bantuan ini menjadi pembakar semangat dan pemangkin motivasi agar penjawat-penjawat awam terus berkhidmat dan berbakti dengan cemerlang serta sentiasa memberikan yang terbaik kepada Bangsa Johor.

Wabillahitaufik Walhidayah, Assalamualaikum warahmatullahi wabarakatuh.

Sekian, terima kasih.

Saya mohon mencadangkan, Yang Berhormat Datuk Speaker.